



## UNDANG-UNDANG MALAYSIA

### AKTA 127

#### AKTA KUALITI ALAM SEKELILING, 1974

*mengandungi pindaan terkini - Akta A1102/2001*

Tarikh Persetujuan Diraja : 8 Mac 1974

Tarikh diterbitkan dalam *Warta* : 14 Mac 1974

Tarikh mula berkuatkuasa ditetapkan: 15 April 1975 [P.U. (B) 113/75]

---

### SUSUNAN SEKSYEN

---

#### Tajuk Panjang & Mukadimah

#### BAHAGIAN I - PERMULAAN

Seksyen 1. Tajuk ringkas, pemakaian dan mula berkuatkuasa.

Seksyen 2. Tafsiran.

#### BAHAGIAN II - PENTADBIRAN

Seksyen 3. Ketua Pengarah dan lain-lain pegawai.

Seksyen 4. Penubuhan Majlis Kualiti Alam Sekeliling.

Seksyen 5. Tempoh jawatan dan kelayakan untuk dilantik semula.

Seksyen 6. Hilang kelayakan, meletakan jawatan dan mengosongkan jawatan.

Seksyen 7. Memanggil mesyuarat, koram, pengundian, acara dan minit.

Seksyen 8. Pegawai yang mempengerusikan mesyuarat-mesyuarat Majlis.

Seksyen 9. Saraan.

### **BAHAGIAN III - LESEN**

- Seksyen 10. Pihakberkuasa pelesen.
- Seksyen 11. Lesen.
- Seksyen 12. Kuasa untuk mengenakan syarat-syarat kepada lesen.
- Seksyen 13. Tempoh dan pembaharuan lesen.
- Seksyen 14. Pemindahmilikan lesen.
- Seksyen 15. Daftar lesen.
- Seksyen 16. Pemegang lesen hendaklah mematuhi lesen.
- Seksyen 17. Bayaran lesen.

### **BAHAGIAN IV - LARANGAN DAN KAWALAN MENGENAI PENCEMARAN**

- Seksyen 18. Premis yang ditetapkan hendaklah dilesen.
- Seksyen 19. Larangan terhadap menyebabkan kenderaan, kapal atau premis menjadi pembawa yang ditetapkan atau premis yang ditetapkan.
- Seksyen 20. Kehendak dan kelulusan plan.
- Seksyen 21. Kuasa untuk menentukan syarat-syarat pengeluaran, pelepasan, dsb.
- Seksyen 22. Sekatan mengenai pencemaran udara.
- Seksyen 23. Sekatan mengenai pencemaran buni bising.
- Seksyen 24. Sekatan mengenai pencemaran tanah tanah.
- Seksyen 25. Sekatan mengenai pencemaran perairan daratan.
- Seksyen 26. [Dipotong]
- Seksyen 27. Melepaskan minyak ke dalam perairan Malaysia dilarang.
- Seksyen 28. Pembelaan khas.
- Seksyen 29. Melepaskan buangan ke dalam perairan Malaysia dilarang.
- Seksyen 29A. Larangan atas pembakaran terbuka.
- Seksyen 29AA. Tidak termasuk sebagai "pembakaran terbuka".
- Seksyen 29B. Pemunya atau penduduk premis bertanggungjawab bagi pembakaran terbuka.
- Seksyen 29C. Pembelaan
- Seksyen 30. Kuasa untuk melarang penggunaan apa-apa bahan atau kelengkapan.
- Seksyen 30A. Kuasa untuk mengawal penggunaan benda dan keluaran dan menyatakan pelabelan alam sekeliling.
- Seksyen 30B. Kuasa untuk menyatakan kaedah-kaedah mengenai skim deposit dan rebet.
- Seksyen 31. Kuasa menghendaki pemunya atau penduduk memasang, mengendali, membaiki, dsb.
- Seksyen 31A. Perintah larangan, dsb.

Seksyen 32. Pemunya atau penduduk hendaklah menyenggara dan mengendalikan kelengkapan.

Seksyen 33. Kuasa bagi melarang atau mengawal orang-orang yang dileSEN daripada melepaskan dsb.

buangan-buangan dalam hal-hal tertentu.

Seksyen 33A. Audit alam sekeliling.

Seksyen 33B. Larangan terhadap penempatan, peletakan, dsb. buangan terjadual.

Seksyen 34. Pengecualian.

Seksyen 34A. Laporan mengenai kesan kepada alam sekeliling akibat aktiviti yang ditetapkan.

## **BAHAGIAN IVA - KAWALAN BUANGAN TERJADUAL**

Seksyen 34B. Larangan terhadap penempatan, peletakan, dsb. buangan terjadual.

## **BAHAGIAN V - RAYUAN DAN LEMBAGA RAYUAN**

Seksyen 35. Rayuan.

Seksyen 36. Lembaga Rayuan.

## **BAHAGIAN VA - PEMBAYARAN SES DAN KUMPULAN WANG ALAM SEKELILING**

Seksyen 36A. Ses penyelidikan.

Seksyen 36B. Penubuhan Kumpulan Wang Alam Sekeliling.

Seksyen 36C. Jawatankuasa Kumpulan Wang Alam Sekeliling.

Seksyen 36D. Caruman ke dalam Kumpulan Wang.

Seksyen 36E. Pemakaian Kumpulan Wang.

## **BAHAGIAN VI - PELBAGAI**

Seksyen 37. Pemunya atau penduduk hendaklah memberi maklumat.

Seksyen 38. Kuasa untuk menahan, menaiki, menggelidah, dsb.

Seksyen 38A. Kuasa untuk memeriksa orang yang mengetahui kes.

Seksyen 39. Penyampaian notis.

Seksyen 40. Keterangan.

Seksyen 41. Penalti yang tidak diperuntukkan bagi kesalahan-kesalahan.

Seksyen 42. Percubaan dan persubahatan.

Seksyen 43. Kesalahan-kesalahan oleh kumpulan-kumpulan orang dan oleh penjawat-penjawat dan ejen-ejen.

- Seksyen 44. Pendakwaan.
- Seksyen 45. Mengkompaun kesalahan-kesalahan.
- Seksyen 46. Mahkamah Sesyen dan Mahkamah Mejistret Klas Pertama hendaklah mempunyai bidangkuasa.
- Seksyen 46A. Kuasa menyita kenderaan atau kapal.
- Seksyen 46B. Kuasa perlucutahkan dan pelupusan.
- Seksyen 46C. Penyitaan dan perlucutahkan kenderaan atau kapal.
- Seksyen 46D. Tiada kos atau qantirugi berbangkit daripada penyitaan melainkan jika penyitaan dibuat tanpa sebab yang munasabah.
- Seksyen 46E. Pampasan bagi kerugian atau kerosakan kepada harta.
- Seksyen 47. Kuasa bagi menuntut kos dan perbelanjaan.
- Seksyen 48. Kuasa untuk menahan dan menjual kenderaan atau kapal.
- Seksyen 48A. Kuasa menguji dan melarang penggunaan kenderaan.
- Seksyen 48B. Bantuan.
- Seksyen 49. Perwakilan.
- Seksyen 50. Perahsiaan.
- Seksyen 51. Peraturan-peraturan.

NOTA : Kesahan [Akta A1102]

SENARAI PINDAAN

## **Tajuk Panjang & Mukadimah**

Suatu Akta berhubung dengan mencegah, menghapus, mengawal pencemaran dan membaiki alam sekeliling, dan bagi maksud-maksud yang berkaitan dengannya.

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut :

### **BAHAGIAN I – PERMULAAN**

#### **Seksyen 1. Tajuk ringkas, pemakaian dan mula berkuatkuasa.**

(1) Akta ini bolehlah dinamakan **Akta Kualiti Alam Sekeliling, 1974** dan hendaklah dipakai di seluruh Malaysia.

(2) Akta ini hendaklah mula berkuatkuasa pada tarikh yang ditetapkan oleh Menteri melalui pemberitahu dalam *Warta* ditetapkan dan Menteri boleh menetapkan tarikh-tarikh yang berlainan untuk mula berkuatkuasanya peruntukan-peruntukan yang berlainan dalam Akta ini dan boleh menguatkuasakan kesemua atau mana-mana peruntukan-peruntukan dalamnya itu samada di seluruh Malaysia yang baginya dipakai pemberitahu itu atau di kawasan yang dinyatakan dalam pemberitahu itu.

#### **Seksyen 2. Tafsiran.**

Dalam Akta ini, melainkan jika kandungan ayatnya menghendaki makna yang lain -

"alam sekeliling" ertiaya faktor-faktor fizika bagi kawasan di sekeliling manusia termasuk tanah, air, udara, iklim, bunyi, bau, rasa, faktor-faktor biologi bagi binatang-binatang dan tumbuhan-tumbuhan dan faktor-faktor sosial astetika;

"audit alam sekeliling" ertiaya penilaian berkala, sistematik, didokumenkan dan penilaian objektif untuk menentukan-

(a) status pematuhan kepada kehendak pengawalan alam sekeliling;

(b) sistem pengurusan alam sekeliling; dan

(c) risiko alam sekeliling secara keseluruhan bagi premis;

"barang-barang" termasuklah benda berbahaya kepada alam sekeliling, pencemar dan buangan;

"benda berbahaya kepada alam sekeliling" ertinya apa-apa benda semulajadi atau buatan, termasuklah apa-apa bahan mentah, sama ada dalam bentuk pepejal, separuh pepejal atau cecair, atau dalam bentuk gas atau wap, atau dalam campuran sekurang-kurangnya dua daripada benda ini, atau apa-apa organisma hidup yang dicadangkan bagi apa-apa perlindungan, pemeliharaan dan aktiviti kawalan, yang boleh menyebabkan pencemaran;

"boleh dipraktikkan" ertinya boleh dipraktikkan dengan menasabah memandang, antara lain, kepada keadaan dan hal-hal tempatan dan kepada keadaan semasa pengetahuan teknik dan istilah "cara boleh dipraktikkan" termasuklah mengadakan dan menyenggara loji dengan cekap dan menggunakan loji itu dengan sepatutnya dan penyeliaan oleh atau bagi pihak penduduk akan sesuatu proses atau kendalian;

"buangan" termasuklah apa-apa benda yang ditetapkan sebagai buangan terjadual, atau apa-apa benda sama ada dalam bentuk pepejal, separuh pepejal, atau cecair, atau dalam bentuk gas atau wap yang dilepaskan, dikeluarkan atau diletakkan dalam alam sekeliling dalam apa-apa isipadu, komposisi atau cara yang menyebabkan pencemaran;

"buangan terjadual" ertinya apa-apa buangan yang ditetapkan oleh Menteri dalam peraturan-peraturan sebagai buangan terjadual;

"campuran mengandungi minyak" ertinya sesuatu campuran dengan apa-apa kandungan minyak yang ditentukan oleh Menteri atau, jika kandungan minyak itu tidak ditentukan, sesuatu campuran dengan kandungan minyak sebanyak satu ratus bahagian atau lebih dalam satu juta bahagian campuran itu;

"ditetapkan" ertinya ditetapkan oleh atau di bawah Akta ini atau diteruskan kuatkuasanya oleh Akta ini;

"dokumen" ertinya apa-apa hal yang dinyatakan, diperihalkan, atau bagaimana juu pun digambarkan, pada apa-apa benda, bahan, barang atau artikel, termasuklah apa-apa hal yang terkandung dalam cakera, pita, filem, runut bunyi atau alat, dengan menggunakan -

- (a) apa-apa huruf, angka, tanda, simbol, isyarat, lambang, atau bentuk pernyataan, perihalan atau gambaran lain;
- (b) suatu rakaman visual (sama ada apa-apa imej kaku atau bergerak);
- (c) suatu rakaman bunyi, atau apa-apa rakaman elektronik, magnetik, mekanikal atau rakaman lain, atau oleh apa-apa bunyi, tekanan elektronik atau data lain; atau
- (d) suatu rakaman, atau pemancaran, atas suatu jarak apa-apa hal dengan mana-mana, atau apa-apa kombinasi, cara yang disebut dalam perenggan (a), (b) atau (c), atau dalam perenggan ini;

"Jawatankuasa" ertinya Jawatankuasa Kumpulan Wang Alam Sekeliling yang ditubuhkan di bawah seksyen 36C;

"kapal" termasuklah tiap-tiap jenis vesal atau perahu atau binaan terapung;

"kegunaan berfaedah" ertinya sesuatu kegunaan alam sekeliling atau apa-apa unsur atau segmen alam sekeliling yang bermanfaat kepada kesihatan, kebajikan atau keselamatan awam dan yang memerlukan perlindungan daripada kesan-kesan buangan-buangan, lepasan-lepasan, keluaran-keluaran dan letakan-letakan;

"kelengkapan kawalan" termasuklah-

- (a) apa-apa perkakas untuk memungut buangan-buangan;
- (b) apa-apa alat otomatik yang digunakan untuk membolehkan sesuatu kelengkapan dikendalikan dengan cekap;
- (c) apa-apa alat untuk menunjuk atau merekod pencemaran yang berlebih-lebihan;
- (d) apa-apa alat atau kemudahan lain yang digunakan bagi maksud menghadkan pencemaran;

"keluaran yang ditetapkan" ertinya apa-apa keluaran yang ditetapkan oleh Menteri di bawah perenggan 30A (1) (b);

"kenderaan" ertinya suatu struktur yang berupaya bergerak atau digerakkan atau digunakan bagi mengangkat orang atau benda dan yang sentiasa bersentuhan dengan permukaan bumi semasa bergerak;

"Ketua Pengarah" ertinya Ketua Pengarah Kualiti Alam Sekeliling yang disebutkan dalam seksyen 3;

"komputer" ertinya apa-apa alat, yang dikenalpasti dengan nama atau perihalan apa pun, bagi merekodkan, menyimpan, memproses, mendapatkan semula atau mengeluarkan apa-apa maklumat atau hal, atau bagi melaksanakan mana-mana satu fungsi itu atau lebih; dan, jika dua komputer atau lebih menjalankan mana-mana fungsi itu atau lebih sebagai kombinasi, disatukan, atau berturutan, komputer itu hendaklah dikira sebagai satu komputer;

"Kumpulan Wang" ertinya Kumpulan Wang Alam Sekeliling yang ditubuhkan di bawah seksyen 36B;

"loji perindustrian" ertinya sesuatu loji yang digunakan untuk menjana kuasa atau untuk apa-apa kegunaan perindustrian atau untuk mengendalikan kapal, kapal-korek, loko, kerin atau lain-lain mesin;

"Majlis" ertinya Majlis Kualiti Alam Sekeliling yang ditubuhkan di bawah seksyen 4;

"Menteri" ertinya Menteri yang bertanggungjawab bagi perlindungan alam sekeliling;

"minyak" ertinya -

(a) minyak mentah, minyak disel, minyak bahanapi dan minyak pelincir; dan

(b) apa-apa lain jenis minyak yang ditetapkan oleh Menteri;

"pembawa yang ditetapkan" ertinya kenderaan atau kapal yang ditetapkan oleh Menteri di bawah seksyen 18 sebagai pembawa yang ditetapkan;

"pemunya" berhubung dengan -

(a) mana-mana premis, ertinya -

- (i) tuan punya berdaftar premis itu;
- (ii) pemegang pajak bagi sesuatu pajakan termasuklah suatu pajakan kecil premis itu, sama ada didaftarkan atau tidak;
- (iii) ejen atau pemegang amanah mana-mana pemunya yang diperihalkan dalam sub-perenggan (i) dan (ii) takrif ini atau jika pemunya yang diperihalkan dalam sub-perenggan (i) dan (ii) itu tidak dapat dikesan atau telah mati, wakil dirinya yang sah di sisi undang-undang; atau
- (iv) orang yang pada masa itu menerima sewa premis itu sama ada bagi faedahnya sendiri atau sebagai ejen atau pemegang amanah bagi mana-mana orang lain atau sebagai penerima atau yang akan menerima sewa jika premis itu disewakan kepada seorang tenan;

(b) sesuatu kapal, ertinya -

- (i) orang yang didaftarkan sebagai pemunya kapal itu;
- (ii) jika tiada pendaftaran, orang yang mempunyai kapal itu;
- (iii) dalam hal kapal yang dippunyai oleh mana-mana negeri dan dikendalikan oleh suatu syarikat yang berdaftar dalam negeri itu sebagai pengendali kapal, "pemunya" hendaklah termasuk negeri itu; atau
- (iv) ejen atau pemegang amanah mana-mana pemunya yang diperihalkan dalam sub-perenggan (i), (ii) dan (iii), atau jika pemunya yang diperihalkan dalam subperenggan (i) dan (ii) itu tidak dapat dikesan atau telah mati, wakil dirinya yang sah di sisi undang-undang;

(c) mana-mana kenderaan atau pesawat udara, ertinya orang yang berdaftar sebagai pemunya kenderaan atau pesawat udara itu;

"pencemar" ertinya apa-apa benda semulajadi atau buatan, sama ada dalam bentuk pepejal, separuh pepejal atau cecair, atau dalam bentuk gas atau wap, atau campuran sekurang-kurangnya dua daripada benda ini, atau bau-bau busuk atau bunyi bising atau haba yang dilepaskan, dikeluarkan atau diletakkan

atau yang berkemungkinan dilepaskan, dikeluarkan atau diletakkan daripada mana-mana sumber yang boleh secara langsung atau tidak langsung menyebabkan pencemaran dan termasuk apa-apa benda berbahaya kepada alam sekeliling;

"pencemaran" ertinya apa-apa perubahan langsung atau taklangsung kepada sifat-sifat fizika, haba, kimia, atau biologi mana-mana bahagian alam sekeliling dengan melepaskan, mengeluarkan atau meletakkan benda berbahaya kepada alam sekeliling, pencemar atau buangan-buangan hingga menjadikan apa-apa kegunaan berfaedah, menyebabkan suatu keadaan yang merbahaya atau mungkin merbahaya kepada kesihatan, keselamatan atau kebajikan awam, atau kepada binatang, burung, hidup-hidupan liar, ikan atau hidupan-hidupan dalam air, atau kepada tumbuhan-tumbuhan atau menyebabkan suatu pelanggaran terhadap apa-apa syarat, had atau sekatan yang dikenakan ke atas sesuatu lesen yang dikeluarkan di bawah Akta ini;

"penduduk" ertinya seseorang yang menduduki atau mengawal-

- (a) mana-mana premis; atau
- (b) berhubungan dengan premis yang bahagian yang berlainan diduduki oleh orang yang berlainan, orang yang masing-masingnya menduduki atau mengawal setiap bahagian itu; atau
- (c) apa-apa kenderaan, kapal atau pesawat udara;

"perairan daratan" ertinya apa-apa takungan, kolam, tasik, sungai, anak sungai, tali air, parit, mata air atau telaga, atau mana-mana bahagian laut di atas tikas air rendah di sepanjang pantai, atau mana-mana badan dengan permukaan semulajadi atau buatan yang lain atau subpermukaan air;

"perairan Malaysia" ertinya perairan Wilayah Malaysia sebagaimana yang ditentukan menurut Ordinan

No. 7 (Kuasa-Kuasa Perlu) Darurat, 1969 [P.U. (A) 307A/69];

"pesawat udara" termasuklah apa-apa jenis kenderaan yang digunakan bagi membawa penumpang atau barang-barang melalui udara;

"pihak berkuasa tempatan" termasuklah mana-mana orang atau kumpulan orang yang dilantik di bawah mana-mana undang-undang bertulis untuk menjalankan dan melaksanakan kuasa dan kewajipan yang diberikan kepada atau dikenakan ke atas pihak berkuasa tempatan di bawah mana-mana undang-undang bertulis;

"premis" termasuklah mesuaj, bangunan, tanah, dan hereditamen tiap-tiap pemegangan dan apa-apa jentera atau loji;

"premis yang ditetapkan" ertinya sesuatu premis yang ditetapkan oleh Menteri di bawah seksyen 18;

"program pengawasan" ertinya segala tindakan yang diambil dan segala kelengkapan yang digunakan bagi maksud mengesan atau mengukur dari segi kuantiti atau kualiti adanya, jumlah atau aras apa-apa benda, ciri atau kesan;

"risiko alam sekeliling" ertinya apa-apa risiko, bahaya atau kemungkinan akibat buruk yang boleh terjadi pada alam sekeliling;

"segmen" berhubung dengan alam sekeliling ertinya mana-mana bahagian atau bahagian-bahagian alam sekeliling yang dinyatakan mengikut ukuran isipadu, ruangan, keluasan, kuantiti, atau masa atau apa-apa campurannya;

"sistem pengurusan alam sekeliling" ertinya sistem yang terdiri daripada suatu struktur organisasi dengan tanggungjawab, amalan, prosedur, proses dan sumbernya bagi melaksanakan dan menyenggara sistem yang berhubungan dengan alam sekeliling;

"tanahtanah" termasuklah tanah, pasir, batu-batan, syil dan galian dan tumbuh-tumbuhan dalam tanahtanah;

"transit" ertinya laluan berterusan dari satu sempadan ke sempadan lain melalui wilayah dan perairan

Malaysia tanpa simpanan;

"tred" ertinya apa-apa tred, urusan atau pengusahan samada biasanya dijalankan di premis yang tetap atau di berbagai-bagai tempat yang mengakibatkan pelepasan buangan-buangan dan termasuklah apa-apa aktiviti yang ditetapkan sebagai suatu tred, urusan atau pengusahan bagi maksud-maksud Akta ini;

"unsur" berhubung dengan alam sekeliling ertinya mana-mana daripada bahagian-bahagian juzuk utama alam sekeliling, termasuk air, udara, tanahtanah, tumbuhan-tumbuhan, iklim, bunyi, bau, astetika, ikan dan hidupan-hidupan liar.

[Mas. Akta A636 : s.2; Mas. Akta A953 : s.2 : Pin. Akta A1102/2001]

## **BAHAGIAN II – PENTADBIRAN**

### **Seksyen 3. Ketua Pengarah dan lain-lain pegawai.**

(1) Maka hendaklah ada seorang Ketua Pengarah Kualiti Alam Sekeliling yang dilantik oleh Menteri dari antara anggota-anggota perkhidmatan awam dan yang kuasa-kuasa, kewajipan-kewajipan dan tugas-tugasnya ialah -

- (a) mentadbirkan Akta ini dan apa-apa peraturan dan perintah yang dibuat di bawahnya;
- (b) bertanggungjawab atas dan menyelaraskan segala aktiviti berhubung dengan pelepasan buangan-buangan ke alam sekeliling dan bagi mencegah atau mengawal pencemaran dan memperlindungi dan membaiki kualiti alam sekeliling;
- (c) mengesyorkan kepada Menteri dasar perlindungan alam sekeliling dan pengklasan-pengklasan bagi perlindungan mana-mana bahagian alam sekeliling atau mana-mana segmen alam sekeliling berkenaan dengan kegunaan-kegunaan dan nilai-nilai, samada zahir atau tak zahir, yang hendak diperlindungi, kualiti yang hendak disenggara, takat pelepasan buangan-buangan boleh dibenarkan tanpa memudaratkan kualiti alam sekeliling, kegunaan dan rancangan kemajuan jangka panjang dan apa-apa faktor lain berhubung dengan perlindungan dan pembaikan alam sekeliling;
- (d) mengawal dan mengeluarkan lesen, isipadu, jenis-jenis, juzuk-juzuk dan kesan-kesan buangan-buangan, lepasan-lepasan, keluaran-keluaran, letakan-letakan atau lain-lain punca keluaran dan benda-benda yang merbahaya atau mungkin merbahaya kepada kualiti alam sekeliling atau mana-mana segmen alam sekeliling;
- (e) menjalankan pemeriksaan dan penyiasatan tentang sebab-sebab, jenis, takat pencemaran dan tentang cara-cara mencegah pencemaran dan membantu dan bekerjasama dengan lain-lain orang atau badan yang menjalankan pemeriksaan atau penyiasatan yang seumpamanya;
- (f) menjalani, memajukan dan menyelaraskan penyelidikan berhubung dengan apa-apa aspek pencemaran atau pencegahannya dan mengadakan kritirium-kritirium bagi perlindungan dan pembaikan alam sekeliling;

- (g) mengesyorkan kepada Menteri standad-standad dan kritirium-kritirium bagi perlindungan kegunaan-kegunaan berfaedah dan penyenggaraan kualiti alam sekeliling dengan memandang kepada kebolehan alam sekeliling itu menyerap buangan tanpa memudaratkan kualitinya dan lain-lain ciri-cirinya;
- (h) memilih mana-mana orang atau badan untuk menjadi penal-penal pakar, yang difikirkannya berkebolehan untuk membantunya berhubung dengan masaalah-masaalah khas;
- (i) menyiarkan suatu laporan tahunan mengenai kualiti alam sekeliling tidak lewat daripada 30hb September dalam tahun yang berikutnya dan apa-apa laporan dan maklumat lain berkenaan dengan apa-apa aspek perlindungan alam sekeliling;
- (j) menentukan cara-cara yang hendak dipakai bagi mengambil contoh-contoh dan membuat ujian-ujian bagi maksud Akta ini;
- (k) menjalankan penyiasatan-penyiasatan dan pemeriksaan-pemeriksaan bagi mempastikan pematuhan terhadap Akta ini atau terhadap peraturan-peraturan yang dibuat di bawahnya dan menyiasat pengaduan-pengaduan berhubung dengan pelanggaran-pelanggaran terhadap Akta ini atau terhadap peraturan-peraturan yang dibuat di bawahnya;
- (l) memberi maklumat dan pendidikan kepada orang awam berkenaan dengan perlindungan dan pemberian alam sekeliling;
- (ll) untuk mentadbir Kumpulan Wang;
- (m) mengadakan dan menyenggara perhubungan dan kerjasama dengan tiap-tiap Pihakberkuasa Negeri dalam Malaysia dan dengan negeri-negeri lain berkenaan dengan perlindungan alam sekeliling, pengawalan pencemaran dan pengurusan buangan-buangan;
- (n) membuat laporan kepada Menteri mengenai perkara-perkara berhubung dengan perlindungan dan pemberian alam sekeliling dan mengenai apa-apa pindaan yang difikirkannya berfaedah kepada mana-mana undang-undang berkenaan dengan pencemaran dan alam sekeliling dan mengenai apa-apa pekerjaan yang dirujukkan kepadanya oleh Menteri; dan
- (o) memajukan, menggalak, menyelaras dan menjalankan rancangan dalam pengurusan alam sekeliling, pengurusan buangan-buangan dan pengawalan pencemaran.

(2) Maka hendaklah ada beberapa orang Timbalan Ketua Pengarah Kualiti Alam Sekeliling dan beberapa orang pegawai lain sebagaimana yang perlu dan mustahak yang dilantik oleh Menteri dari antara anggota-anggota perkhidmatan awam bagi mentadbirkan Akta ini dengan sempurna.

(3) Menteri boleh memberi kepada Ketua Pengarah arahan-arahan jenis am yang tidak berlawanan dengan Akta ini tentang penjalanan kuasa-kuasa, kewajipan-kewajipan dan tugas-tugas Ketua Pengarah

di bawah Akta ini dan Ketua Pengarah hendaklah melaksanakan apa-apa arahan yang diberi sedemikian.

(4) Melainkan jika dikecualikan di bawah mana-mana peraturan yang di buat di bawah Akta ini, seseorang Timbalan Ketua Pengarah dan seorang pegawai lain boleh manjalankan mana-mana kuasa, kewajipan dan tugas Ketua Pengarah di bawah Akta ini.

[Mas. Akta A953 : s.3]

#### **Seksyen 4. Penubuhan Majlis Kualiti Alam Sekeliling.**

(1) Maka adalah dengan ini ditubuhkan bagi maksud Akta ini suatu badan bernama Majlis Kualiti Alam Sekeliling dan tugas-tugasnya ialah -

(a) pada amnya menasihatkan Menteri mengenai perkara-perkara berhubung dengan Akta ini;

dan

(b) menasihatkan Menteri mengenai apa-apa perkara yang dirujukkan kepadanya oleh Menteri.

(2) Majlis hendaklah terdiri daripada ahli-ahli yang berikut -

(a) seorang Pengerusi yang dilantik oleh Menteri;

(b) Ketua Setiausaha Kementerian Sains, Teknologi dan Alam Sekitar atau wakilnya yang diberikuasa;

(c) Ketua Setiausaha, Kementerian Perdagangan Antarabangsa dan Industri atau wakilnya yang diberikuasa;

(cc) Ketua Setiausaha, Kementerian Perdagangan Dalam Negeri dan Hal Ehwal Pengguna atau wakilnya yang diberikuasa;

- (ccc) Ketua Setiausaha, Kementerian Pertanian atau wakilnya yang diberikuasa;
  - (d) Ketua Setiausaha, Kementerian Sumber Manusia atau wakilnya yang diberikuasa;
  - (dd) Ketua Setiausaha, Kementerian Pengangkutan atau wakilnya yang diberikuasa;
  - (e) Ketua Pengarah Kesihatan atau wakilnya yang diberi kuasa;
  - (f) seorang ahli dari Sabah dan seorang ahli dari Sarawak yang dilantik oleh Menteri selepas berunding dengan Kerajaan-kerajaan Negeri Sabah dan Negeri Sarawak;
  - (g) seorang ahli yang dilantik oleh Menteri dari antara orang-orang yang mengambil bahagian dalam perindustrian petroleum;
  - (gg) seorang ahli yang dilantik oleh Menteri daripada orang-orang yang dinamakan oleh industri kelapa sawit;
  - (h) seorang ahli yang dilantik oleh Menteri dari antara orang-orang yang dinamakan oleh Persekutuan Pengilang-pengilang Malaysia atau, jika Persekutuan itu tidak ada lagi, dari antara orang-orang yang mengambil bahagian dalam pengilangan;
  - (hh) seorang ahli yang dilantik oleh Menteri daripada orang-orang yang dinamakan oleh industri getah;
  - (i) seorang ahli yang dilantik oleh Menteri dari antara kakitangan-kakitangan akademik universiti-universiti atau kolej-kolej dalam Malaysia;
  - (j) dua orang ahli yang dilantik oleh Menteri daripada antara pertubuhan-pertubuhan berdaftar yang mempunyai pengetahuan yang luas dan mempunyai kepentingan dalam perkara-perkara yang berhubungan dengan alam sekeliling.
- (3) Menteri boleh, mengenai tiap-tiap seorang ahli yang dilantik di bawah perenggan (f), (g), (gg), (h), (hh), (i) dan (j) seksyen kecil (2), melantik seorang untuk menjadi seorang ahli giliran bagi menghadiri

sebagai ganti ahli itu mesyuarat-mesyuarat Majlis jika ahli itu tidak dapat hadir oleh kerana sesuatu sebab.

(4) Apabila menghadiri mesyuarat-mesyuarat Majlis, seseorang ahli giliran hendaklah disifatkan sebagai ahli Majlis bagi segala maksud.

(5) Seseorang ahli giliran hendaklah berhenti menjadi ahli giliran apabila ahli yang mengenainya ia menjadi ahli giliran itu berhenti menjadi ahli Majlis, melainkan jika ahli giliran itu meletakkan jawatannya terlebih dahulu atau perlantikannya dibatalkan terlebih dahulu.

[Pin. Akta A636 : s.3; Pin. Akta A953 : s.4]

## **Seksyen 5. Tempoh jawatan dan kelayakkan untuk dilantik semula.**

Tiap-tiap ahli Majlis yang dilantik hendaklah memegang jawatan selama tempoh tidak lebih daripada tiga tahun melainkan jika ia meletakkan jawatannya atau perlantikannya dibatalkan terlebih dahulu dan adalah layak untuk dilantik semula.

## **Seksyen 6. Hilang kelayakan, meletakkan jawatan dan mengosongkan jawatan.**

(1) Orang -orang yang berikut adalah hilang kelayakan daripada dilantik atau daripada menjadi ahli Majlis-

(a) seseorang yang tidak sempurna akal atau pun tidak berupaya menjalankan kewajipan- kewajipannya;

(b) seseorang yang telah didapati bersalah atas suatu kesalahan berkenaan dengan tipuan, kecurangan atau keburukan akhlak; dan

(c) seseorang yang bankrap atau yang telah membuat sesuatu perkiraan dengan sipiutang- sipiutangnya.

(2) Seseorang ahli Majlis yang dilantik hendaklah disifatkan sebagai telah mengosongkan jawatannya -

(a) apabila ia mati;

- (b) apabila ia meletakkan jawatan;
  - (c) apabila ia tidak menghadiri mesyuarat Majlis tiga kali berturut-turut tanpa kebenaran daripada Menteri; atau
  - (d) jika ia hilang kelayakan di bawah seksyen-kecil (1),
- dan seorang ahli baharu hendaklah dilantik menggantikannya mengikut peruntukan-peruntukan Akta ini.

### **Seksyen 7. Memanggil mesyuarat, koram, pengundian, acara dan minit.**

- (1) Majlis hendaklah bermesyuarat sekali dalam tiap-tiap empat bulan dalam setahun dan hendaklah, sebagai tambahan, bermesyuarat sebagaimana dan apabila dipanggil oleh Pengerusi.
- (2) Lapan orang ahli adalah menjadi koram dalam sesuatu mesyuarat Majlis.
- (3) Jika mengenai sesuatu soal yang hendak diputuskan oleh Majlis bilangan undi didapati sama banyaknya, Pengerusi atau jika Pengerusi tidak hadir ahli yang mempengerusikan mesyuarat itu adalah berhak memberi suatu undi pemutus sebagai tambahan kepada undi biasanya.
- (4) Tertakluk kepada Akta ini, Majlis hendaklah menetapkan acaranya sendiri.
- (5) Minit hendaklah disimpan mengenai segala mesyuarat Majlis dan salinan-salinannya hendaklah dihantar kepada Menteri.
- (6) Menteri boleh menjemput atau meminta seorang, yang bukan anggota Majlis, untuk menghadiri apa-apa mesyuarat Majlis bagi maksud menasihatinya mengenai perkara yang dibincangkan tetapi orang yang hadir sedemikian itu tidak berhak mengundi dalam mesyuarat itu.

[Pin. Akta A636 : s.4 ; Mas. Akta A953 : s.5 ]

### **Seksyen 8. Pegawai yang mempengerusikan mesyuarat-mesyuarat Majlis.**

- (1) Pengerusi Majlis hendaklah mempengerusikan segala mesyuarat Majlis.

- (2) Jika, oleh kerana tidak hadir atau tidak berupaya bertugas oleh sebab sakit atau apa-apa sebab lain, Pengerusi Majlis tidak berupaya mempengerusikan sesuatu mesyuarat maka ahli-ahli yang hadir hendaklah memilih seorang dari antara mereka untuk mempengerusikan mesyuarat itu.
- (3) Tiada apa-apa urusan boleh dijalankan dalam sesuatu mesyuarat Majlis semasa Pengerusi tidak hadir sehingga seorang ahli telah dipilih untuk mempengerusikan mesyuarat itu.

## **Seksyen 9. Saraan.**

Tiap-tiap ahli yang dilantik boleh dibayar sejumlah wang yang ditetapkan oleh Menteri kerana menghadiri sesuatu mesyuarat Majlis.

## **BAHAGIAN III – LESEN**

### **Seksyen 10. Pihak berkuasa pelesen.**

Ketua Pengarah hendaklah menjadi pihakberkuasa pelesen.

### **Seksyen 11. Lesen.**

- (1) Sesuatu permohonan untuk sesuatu lesen atau untuk membaharui atau memindahmilik sesuatu lesen hendaklah dibuat kepada Ketua Pengarah dalam borang yang ditetapkan dan hendaklah disertai dengan bayaran yang ditetapkan melainkan jika Ketua Pengarah membenarkan pembayaran dibuat secara ansuran.
- (2) Seseorang pemohon untuk suatu lesen atau untuk membaharui atau memindahmilik suatu lesen hendaklah memberi secara bertulis atau dengan cara lain apa-apa maklumat yang difikirkan perlu dan berkaitan dengan permohonan itu oleh Ketua Pengarah.
- (3) Ketua Pengarah -

- (a) boleh meluluskan sesuatu permohonan untuk suatu lesen atau untuk membaharui atau memindahmilik suatu lesen, samada tertakluk kepada syarat-syarat atau dengan tidak bersyarat dan jika sesuatu permohonan diluluskan tertakluk kepada syarat-syarat, maka syarat-syarat itu hendaklah dinyatakan dalam lesen yang dimaksudkan oleh permohonan itu;
- (b) boleh dalam masa berkuatkuasanya sesuatu lesen membatalkan atau mengubah sesuatu syarat yang dikenakan kepada lesen itu atau mengenakan syarat-syarat baharu kepadanya samada sebagai tambahan kepada atau menggantikan syarat-syarat yang sedia ada dan hendaklah memberitahu pemegang lesen itu tentang tindakannya bagi maksud itu; atau
- (c) tidak boleh meluluskan sesuatu permohonan untuk suatu lesen berkenaan dengan sesuatu premis yang penggunaannya sebagai demikian akan melanggar sesuatu skim rancangan bandar, atau mana-mana undang-undang berhubung dengan penggunaan atau kemajuan tanah.
- (4) Sebelum mengubah sesuatu syarat yang dikenakan kepada lesen atau sebelum mengenakan syarat-syarat baharu kepada lesen, Ketua Pengarah hendaklah mempertimbangkan -
- (a) samada memadankan kelengkapan, kelengkapan kawalan atau loji perindustrian yang sedia ada bagi mematuhi syarat yang diubah atau yang baharu akan boleh dipraktikkan;
- (b) lamanya kelengkapan, kelengkapan kawalan atau loji perindustrian yang sedia ada boleh dipakai secara ekonomi dengan memandang kepada tarikh ianya dibeli;
- (c) kuantiti atau takat susutan keluaran, lepasan atau letakan buangan-buangan yang akan dicapai dengan syarat yang diubah atau yang baharu itu;
- (d) kos yang dianggarkan yang akan dilakukan oleh pemegang lesen bagi mematuhi syarat yang diubah atau yang baharu itu;
- (e) jenis dan besarnya tred, proses atau perindustrian yang sedang dijalankan dalam premis itu.

- (5) Dalam sesuatu hal yang baginya dipakai seksyen-kecil (3) (c), permohonan untuk lesen hendaklah disifatkan sebagai diputuskan dengan muktamad dengan keengganan meluluskan permohonan itu, atau jika suatu rayuan dibuat terhadap keengganan itu, apabila keputusan dibuat mengenai rayuan itu.

## **Seksyen 12. Kuasa untuk mengenakan syarat-syarat kepada lesen.**

(1) Tanpa menyentuh keluasan seksyen 11, sesuatu syarat yang dikenakan kepada sesuatu lesen oleh Ketua Pengarah -

(a) boleh menghendaki pemegang lesen itu -

(i) membaiki, mengubah atau mengganti sesuatu kelengkapan dalam atau pada mana-mana premis yang dinyatakan dalam lesen itu;

(ii) memasang dan mengendalikan kelengkapan kawalan dalam atau pada mana-mana premis yang dinyatakan dalam lesen itu;

(iii) membaiki, mengubah atau menggantikan sesuatu kelengkapan kawalan yang dipasang dalam atau pada mana-mana premis yang dinyatakan dalam lesen itu;

(iv) menjalankan, atas perbelanjaannya sendiri, sesuatu program pengawasan yang direka bentuk untuk memberi maklumat kepada Ketua Pengarah berkenaan dengan ciri-ciri, kuantiti atau kesan-kesan keluaran, lepasan, atau letakan yang berkenaan denganya lesen itu dikeluarkan, dan maklumat yang direkodkan oleh program itu hendaklah diberi kepada Ketua Pengarah pada bila-bila masa dan mengikut apa-apa cara yang ditentukan oleh Ketua Pengarah; atau

(v) menjalankan mana-mana daripada kehendak-kehendak yang ditanggungkan ke atasnya di bawah peruntukan-peruntukan yang tersebut di atas dalam perenggan ini dalam tempoh yang dinyatakan dalam syarat-syarat itu; atau

(b) boleh melarang pemegang lesen itu daripada mengubah atau mengganti sesuatu kelengkapan kawalan yang dipasang dalam atau pada mana-mana premis yang dinyatakan dalam lesen itu kecuali dengan kebenaran bertulis terlebih dahulu daripada Ketua Pengarah.

(2) Jika sesuatu hak untuk merayu diberi di bawah Akta ini terhadap keputusan Ketua Pengarah mengenakan sesuatu syarat kepada sesuatu lesen, apa-apa syarat yang dikenakan sedemikian tidak mempunyai apa-apa kuatkuasa sehingga telah tamat masa yang dihadkan untuk merayu terhadap syarat

itu dan, jika sesuatu rayuan terhadap syarat itu telah dibuat dengan sempurnanya di bawah Akta ini, sehingga pembicaraan rayuan itu mengesahkan keputusan Ketua Pengarah mengenakan syarat

itu.

### **Seksyen 13. Tempoh dan pembaharuan lesen.**

- (1) Sesuatu lesen hendaklah tetap berkuatkuasa selama satu tahun dari tarikh ia dikeluarkan melainkan jika selainnya dinyatakan dalam lesen itu atau dalam mana-mana peraturan yang dibuat dalam Akta ini dan boleh diperbaharui apabila permohonan dibuat dalam tempoh yang ditetapkan di bawah ini.
- (2) Pemegang sesuatu lesen yang hendak mendapatkan pembaharuan lesenya hendaklah membuat permohonan kepada Ketua Pengarah dalam bentuk yang ditetapkan untuk pembaharuan lesen itu pada bila-bila masa tidak kurang daripada tiga bulan dan tidak lebih daripada empat bulan sebelum tarikh tamatnya tempoh lesen itu atau tamatnya tempoh pembaharuan yang masih ada bagi lesen itu, mengikut mana yang berkenaan.
- (3) Seseorang yang tidak memohon pembaharuan dalam masa yang dinyatakan dalam seksyen-kecil (2) hendaklah membayar suatu bayaran lewat sebanyak satu peratus dari bayaran lesen itu atau sepuluh ringgit, mengikut mana yang lebih besar bagi tiap-tiap satu hari kelewatan.
- (4) Jika sesuatu permohonan untuk pembaharuan dibuat selepas tamatnya tempoh lesen itu, Ketua Pengarah boleh enggan memperbaharui lesen itu atau boleh memperbaruiinya tertakluk kepada pengenaan sesuatu bayaran tempoh-tempoh sebanyak tidak lebih daripada lima ratus peratus daripada bayaran lesen itu atau sepuluh ribu ringgit, mengikut mana yang lebih besar.
- (5) Jika sesuatu permohonan dibuat melalui pos, tarikh cap-pos disampulnya hendaklah disifatkan sebagai tarikh permohonan itu telah dibuat dan mengenai perkara-perkara dalam mana Ketua Pengarah tidak dapat menentukan tarikh pada cop-pos itu, maka permohonan itu hendaklah disifatkan sebagai telah dibuat tiga hari sebelum tarikh permohonan itu telah diterima oleh Ketua Pengarah.

[Pin. Akta A636 : s.6]

### **Seksyen 14. Pemindahmilikan lesen.**

Jika pemegang sesuatu lesen tidak lagi menjadi penduduk bagi premis yang dinyatakan dalam lesen itu penduduk bagi premis itu boleh membuat permohonan dalam bentuk yang ditetapkan, disertai dengan bayaran yang ditetapkan, kepada Ketua Pengarah supaya diluluskan pemindahmilikan lesen mengenai premis itu kepadanya.

## **Seksyen 15. Daftar lesen.**

Maka hendaklah disimpan apa-apa daftar lesen sebagaimana yang ditetapkan.

## **Seksyen 16. Pemegang lesen hendaklah mematuhi lesen.**

- (1) Pemegang sesuatu lesen hendaklah mematuhi had-had dan syarat-syarat lesen itu dalam tiap-tiap hal.
- (2) Mana-mana pemegang lesen yang melanggar subseksyen (1) adalah melakukan suatu kesalahan dan boleh dikenakan denda tidak lebih daripada dua puluh lima ribu ringgit atau penjara selama tempoh tidak lebih daripada dua tahun atau kedua-duanya dan denda tambahan satu ribu ringgit bagi setiap hari kesalahan itu diteruskan selepas disampaikan kepadanya suatu notis yang diberi oleh Ketua Pengarah menghendaknya patuh kepada terma atau syarat yang dinyatakan di dalamnya itu.

[Pin. Akta A636 : s.7 ; Pin. Akta A953 : s.6]

## **Seksyen 17. Bayaran lesen.**

- (1) Menteri, selepas berunding dengan Majlis, boleh menetapkan bayaran yang kena dibayar berkenaan dengan sesuatu lesen, sesuatu pemindahmilikan atau pembaharuananya.
- (2) Bayaran-bayaran yang berlainan boleh ditetapkan mengikut mana-mana satu atau lebih daripada faktor-faktor yang berikut -
  - (a) klas premis;
  - (b) tempat-letaknya premis itu;
  - (c) kuantiti buangan-buangan yang dilepaskan;
  - (d) pencemar atau klas pencemar-pencemar yang dilepaskan;
  - (e) aras yang sedia ada bagi pencemaran.

- (3) Jika atas sesuatu pemeriksaan adalah dipastikan bahawa pencemar-pencemar atau klas pencemar-pencemar yang dilepas, dikeluar atau diletakkan adalah berlainan daripada yang dinyatakan oleh penduduk dalam permohonannya untuk lesen atau pembaharuan lesen atau kuantiti buangan-buangan yang dilepas, dikeluar atau diletakkan adalah lebih besar daripada yang dinyatakan oleh penduduk dalam permohonannya untuk lesen atau pembaharuan lesen, Ketua Pengarah boleh menuntut apa-apa bayaran yang mungkin telah kena dibayar berkenaan dengan pencemar atau klas pencemar atau kuantiti lepasan, keluaran atau letakan yang berlebih itu.
- (4) Pada mengira bayaran yang kena dibayar di bawah seksyen-kecil (3), penduduk itu hendaklah disifatkan sebagai telah melepas, mengeluar atau meletakkan pencemar atau klas pencemar atau kuantiti buangan itu selama tempoh enam bulan sebelum pemeriksaan itu atau, jika permohonan untuk lesen atau pembaharuan lesen telah dibuat kurang daripada enam bulan sebelum pemeriksaan itu, selama tempoh yang bermula daripada permohonan hingga ke pemeriksaan itu.
- (5) Tiada apa-apa bayaran tambahan kena dibayar di bawah seksyen-seksyen-kecil (3) dan (4) jika jumlah wang tambahan yang kena dibayar itu adalah kurang daripada sepuluh peratus daripada bayaran yang dibayar oleh penduduk dalam tempoh yang bersamaan.

#### **BAHAGIAN IV - LARANGAN DAN KAWALAN MENGENAI PENCEMARAN**

##### **Seksyen 18. Premis yang ditetapkan hendaklah dileSEN.**

- (1) Menteri, selepas berunding dengan Majlis, boleh dengan perintah menetapkan premis (kemudian daripada ini disebut premis yang ditetapkan) yang pendudukan atau penggunaannya oleh seseorang adalah menjadi suatu kesalahan di bawah Akta ini melainkan jika orang itu adalah pemegang bagi sesuatu lesen yang dikeluarkan berkenaan dengan premis itu.
- (1A) Menteri, selepas berunding dengan Majlis, boleh dengan perintah menetapkan kenderaan atau kapal yang digunakan bagi pergerakan, pemindahan, penempatan, atau peletakan buangan (selepas ini disebut pembawa yang ditetapkan) yang penggunaannya oleh mana-mana orang, melainkan jika orang itu adalah pemegang bagi lesen yang dikeluarkan berkenaan dengan pembawa yang ditetapkan itu, adalah menjadi suatu kesalahan di bawah Akta ini.
- (2) Peruntukan-peruntukan seksyen-kecil (1) tidak dipakai bagi seseorang -

- (a) yang pada tarikh mula berkuatkuasanya Akta ini adalah penduduk bagi premis yang ditetapkan dan dalam tempoh yang ditetapkan selepas tarikh itu, ia membuat permohonan untuk suatu lesen berkenaan dengan premis yang ditetapkan itu;
- (b) yang menjadi penduduk bagi sesuatu premis yang ditetapkan berikutan dengan sesuatu perintah yang dibuat oleh Menteri dari semasa ke semasa meminda sesuatu perintah yang dahulu yang dibuat di bawah seksyen ini dengan mana premis yang dahulunya bukan premis yang ditetapkan itu menjadi premis yang ditetapkan, dan dalam tempoh yang ditetapkan, selepas perintah itu disiarkan dalam *Warta*, ia membuat permohonan untuk suatu lesen berkenaan dengan premis yang ditetapkan itu;
- (c) yang telah membuat permohonan supaya dipindahmilik kepadanya suatu lesen berkenaan dengan sesuatu premis yang ditetapkan dan permohonan itu telah dibuat olehnya dalam tempoh yang ditetapkan selepas ia menjadi penduduk bagi premis yang ditetapkan itu,

sehingga permohonannya telah diputuskan dengan muktamad.

(3) Seseorang yang didapati bersalah atas suatu kesalahan di bawah subseksyen (1) atau (1A) boleh dikenakan denda tidak lebih daripada lima puluh ribu ringgit atau penjara selama tempoh tidak lebih daripada dua tahun atau kedua-duanya dan denda tambahan satu ribu ringgit bagi setiap hari kesalahan

itu diteruskan selepas disampaikan kepadanya suatu notis yang diberi oleh Ketua Pengarah menghendaknya menghentikan perbuatan yang dinyatakan di dalamnya itu.

[Mas. Akta A636 : s.8 ; Pin. Akta A953 : s.7]

### **Seksyen 19. Larangan terhadap menyebabkan kenderaan, kapal atau premis menjadi pembawa yang ditetapkan atau premis yang ditetapkan.**

Tiada seseorang boleh -

- (a) menjalankan apa-apa kerja pada sesuatu kenderaan atau kapal, atau premis yang akan menyebabkan kenderaan atau kapal, atau premis untuk menjadi pembawa yang ditetapkan atau premis yang ditetapkan, mengikut mana-mana yang berkenaan; atau

- (b) membina di atas mana-mana tanah sesuatu bangunan yang direkabentuk untuk atau digunakan bagi sesuatu maksud yang akan menyebabkan tanah atau bangunan itu menjadi premis yang ditetapkan,

tanpa mendapat kebenaran bertulis terlebih dahulu daripada Ketua Pengarah.

[Pin. Akta A953 : s.8]

## **Seksyen 20. Kehendak dan kelulusan plan.**

(1) Tiap-tiap permohonan untuk menjalankan apa-apa kerja, bangunan, binaan atau perubahan yang dinyatakan dalam seksyen 19 hendaklah dihantar kepada Ketua Pengarah dan hendaklah disertai dengan -

- (a) plan-plan dan penentuan-penentuan bagi kerja, bangunan, binaan atau perubahan yang dicadangkan itu bersama dengan butir-butir mengenai kelengkapan kawalan, jika ada, yang hendak dipasang;
- (b) suatu plan susunatur menunjukkan tapakbina bagi kerja, bangunan, binaan atau perubahan yang dicadangkan itu akan dilaksanakan berhubung dengan kawasan-kawasan disekelilingnya;
- (c) butir-butir mengenai tred, perindustrian atau proses yang dicadang hendak dijalankan dalam premis itu;
- (d) perihal juzuk-juzuk dan ciri-ciri buangan; dan
- (e) apa-apa maklumat lain yang dikehendaki oleh Ketua Pengarah,

dan pemohon hendaklah membayar bayaran yang ditetapkan.

(2) Ketua Pengarah boleh meluluskan permohonan itu samada tertakluk kepada syarat-syarat atau dengan tidak bersyarat dan boleh menghendaki pemegang lesen itu mengadakan dan menanggung kos bagi kelengkapan kawalan dan kos bagi suatu program pengawasan yang memuaskan :

Dengan syarat bahawa tiada sesuatu permohonan boleh diluluskan melainkan jika pemohon telah mendapat kelulusan rancangan daripada pihak berkuasa perancang yang layak.

## **Seksyen 21. Kuasa untuk menentukan syarat-syarat pengeluaran, pelepasan, dsb.**

Menteri, selepas berunding dengan Majlis, boleh melalui peraturan-peraturan menentukan syarat-syarat yang boleh diterima bagi pengeluaran, pelepasan atau peletakan benda berbahaya kepada alam sekeliling, pencemar atau buangan-buangan atau pengeluaran buniyibising ke dalam sesuatu kawasan, segmen atau unsur alam sekeliling dan boleh menguntukkan sesuatu kawasan, segmen atau unsur alam sekeliling ke dalam mana pengeluaran, pelepasan atau peletakan benda berbahaya kepada alam sekeliling, pencemar atau itu adalah dilarang atau disekat.

[Pin. Akta A953 : s. 9 ; Pin. Akta A1102 : s.3]

## **Seksyen 22. Sekatan mengenai pencemaran udara.**

(1) Melainkan jika dilesen, tiada seseorang boleh mengeluar atau melepaskan apa-apa benda berbahaya kepada alam sekeliling, pencemar atau buangan ke dalam udara dengan melanggar syarat-syarat yang boleh diterima yang ditentukan dibawah seksyen 21.

(2) Tanpa menghadkan kluasan seksyen-kecil (1), seseorang hendaklah disifatkan sebagai mengeluar atau melepaskan buangan-buangan ke dalam udara jika -

- (a) ia meletakkan apa-apa benda disuatu tempat dimana benda itu boleh dilepaskan ke dalam udara;
- (b) ia menyebab atau memberar dilepaskan bau-bau yang, oleh sebab keadaan, kepekatan, isipadu atau takatnya, adalah mencela atau mengganggu;
- (c) ia membakar apa-apa buangan tred, proses atau perindustrian; atau
- (d) ia menggunakan apa-apa kelengkapan membakar bahanapi yang tidak dilengkapi dengan sesuatu alat atau kelengkapan kawalan yang dikehendaki dipasang pada kelengkapan itu.

(3) Seseorang yang melanggar seksyen-kecil (1) adalah melakukan suatu kesalahan dan boleh dikenakan denda tidak lebih daripada satu ratus ribu ringgit atau penjara selama tempoh tidak lebih daripada lima tahun atau kedua-duanya dan denda tambahan tidak lebih daripada satu ribu ringgit sehari bagi tiap-tiap hari kesalahan itu diteruskan selepas disampaikan kepadanya suatu notis yang diberi oleh Ketua Pengarah menghendaknya memberhentikan perbuatan yang dinyatakan di dalamnya itu.

[Pin. Akta A953 : s.10]

### **Seksyen 23. Sekatan mengenai pencemaran bunyibising.**

(1) Melainkan jika dileSEN, tiada seseorang boleh mengeluarkan atau menyebab atau membenarkan dikeluarkan apa-apa bunyibising yang lebih kuat bahana, keamatan atau kualitinya dengan melanggar syarat-syarat yang boleh diterima yang ditentukan di bawah seksyen 21.

(2) Seseorang yang melanggar seksyen-kecil (1) adalah melakukan suatu kesalahan dan boleh dikenakan denda tidak lebih daripada satu ratus ribu ringgit atau penjara selama tempoh tidak lebih daripada lima tahun atau kedua-duanya dan denda tambahan tidak daripada lima ratus ringgit sehari bagi tiap-tiap hari kesalahan itu diteruskan selepas disampaikan kepadanya suatu notis yang diberi oleh Ketua Pengarah menghendaknya memberhentikan perbuatan yang dinyatakan di dalamnya itu.

[Pin. Akta A953 : s.11]

### **Seksyen 24. Sekatan mengenai pencemaran tanahtanih.**

(1) Melainkan jika dileSEN, tiada seseorang boleh mencemar atau menyebab atau membenarkan dicemarkan mana-mana tanahtanih atau permukaan mana-mana tanah dengan melanggar syarat-syarat yang boleh diterima yang ditentukan di bawah seksyen 21.

(2) Walau apapun keluasan seksyen-kecil (1), seseorang hendaklah disifatkan sebagai mencemar sesuatu tanahtanih atau permukaan sesuatu tanah jika -

(a) ia meletakkan apa-apa benda samada cecair, pepejal atau gas di dalam atau di atas mana-mana tanahtanih atau di sesuatu tempat di mana benda itu boleh masuk ke dalam mana-mana tanahtanih; atau

(b) ia mengadakan di atas mana-mana tanah suatu tempat melonggok sampah-sarap, tempat membuang kotoran, tempat membuang tanahtanih dan batu-batan, tempat meletakkan enap-

cemar, lobang pancitan buangan atau dengan cara lain menggunakan tanah untuk tempat melupuskan atau tempat melonggok buangan pepejal atau cecair sehingga mencela atau mengganggu manusia atau mengganggu air di bawah tanah atau menjadi mudarat kepada apa-apa kegunaan berfaedah akan tanah-tanah atau permukaan tanah itu.

- (3) Seseorang yang melanggar seksyen-kecil (1) adalah melakukan suatu kesalahan dan boleh dikenakan denda tidak lebih daripada satu ratus ribu ringgit atau penjara selama tempoh tidak lebih daripada lima tahun atau kedua-duanya dan denda tambahan tidak lebih daripada satu ribu ringgit sehari bagi tiap-tiap hari kesalahan itu diteruskan selepas disampaikan kepadanya suatu notis yang diberi oleh Ketua Pengarah menghendaknya memberhentikan perbuatan yang dinyatakan di dalamnya itu.

[Pin. Akta A953 : s. 12]

### **Seksyen 25. Sekatan mengenai pencemaran perairan daratan.**

(1) Melainkan jika dileSEN, tiada seseorang boleh mengeluarkan, melepas atau meletakkan apa-apa benda berbahaya kepada alam sekeliling, pencemar atau buangan ke dalam mana-mana perairan daratan dengan melanggar syarat-syarat yang boleh diterima yang ditentukan di bawah seksyen 21.

(2) Tanpa menghadkan keluasan seksyen-kecil (1) seseorang hendaklah disifatkan sebagai mengeluarkan, melepas atau meletakkan buangan-buangan ke dalam perairan daratan jika -

(a) ia meletakkan apa-apa buangan di dalam atau di atas mana-mana perairan atau di sesuatu tempat di mana buangan itu boleh masuk ke dalam mana-mana perairan;

(b) ia meletakkan apa-apa buangan dalam sesuatu keadaan di mana buangan itu jatuh, turun, mengalir, sejat, dihanyutkan, ditiup atau meresap atau mungkin jatuh, turun, mengalir, sejat atau dihanyutkan, ditiup atau meresap ke dalam mana-mana perairan, atau dengan diketahuinya atau oleh sebab kecualiannya, samada secara langsung atau secara tak langsung, menyebab atau membenarkan apa-apa buangan diletakkan dalam sesuatu keadaan seperti itu; atau

(c) ia menyebabkan suhu perairan yang menerimanya itu naik atau turun sebanyak lebih daripada had yang ditetapkan.

(3) Seseorang yang melanggar seksyen-kecil (1) adalah melakukan suatu kesalahan dan boleh dikenakan denda tidak lebih daripada satu ratus ribu ringgit atau penjara selama tempoh tidak lebih daripada lima tahun atau kedua-duanya dan denda tambahan tidak lebih daripada satu ribu ringgit sehari bagi tiap-tiap hari kesalahan itu diteruskan selepas disampaikan kepadanya suatu notis yang diberi oleh Ketua Pengarah menghendaknya memberhentikan perbuatan yang dinyatakan di dalamnya itu.

[Pin. Akta A953 : s. 13]

## **Seksyen 26. [Dipotong]**

[Dipotong oleh Akta A636 : s.9]

## **Seksyen 27. Melepaskan minyak ke dalam perairan Malaysia dilarang.**

(1) Tiada seorang pun boleh, melainkan jika ia telah diberi lesen, melepaskan atau menumpahkan apa-apa minyak atau campuran yang mengandungi minyak ke dalam perairan Malaysia dengan melanggar syarat-syarat yang boleh diterima yang ditentukan di bawah seksyen 21.

(2) Seseorang yang melanggar seksyen-kecil (1) adalah melakukan suatu kesalahan dan boleh dikenakan denda tidak lebih daripada lima ratus ribu ringgit atau penjara tidak lebih daripada lima tahun atau kedua-duanya.

[Mas. Akta A636 : s.10 ; Pin. Akta A953 : s.14]

## **Seksyen 28. Pembelaan khas.**

Jika seseorang dipertuduh atas sesuatu kesalahan di bawah seksyen 27 maka adalah menjadi suatu pembelaan baginya membuktikan bahawa pelepasan atau penumpahan itu adalah -

- (a) bagi maksud menjamin keselamatan versal;
- (b) bagi maksud menyelamatkan nyawa manusia;

- (c) akibat kerosakan kepada versal dan bahawa segala langkah yang menasabah telah diambil untuk mengelak, menghenti atau mengurangkan pertumpahan itu;
- (d) akibat sesuatu kebocoran, yang bukan disebabkan oleh tidak adanya kecermatan, dan bahawa segala langkah yang menasabah telah diambil untuk menghenti atau mengurangkan kebocoran itu;
- (e) akibat suatu pengaliran yang disebabkan oleh kerja pembersihan minyak, dan bahawa segala langkah yang menasabah telah diambil untuk menghapuskan minyak itu dari pengaliran itu dan bahawa melupuskan pengaliran itu dengan apa-apa cara yang lain daripada melepas atau menumpahkannya ke dalam perairan Malaysia tidak boleh diperaktikkan dengan menasabah.

[Pin. Akta A636 : s.11]

### **Seksyen 29. Melepaskan buangan ke dalam perairan Malaysia dilarang.**

- (1) Melainkan jika dileSEN, tiada seseorang boleh melepaskan benda berbahaya kepada alam sekeliling, pencemar atau buangan-buangan ke dalam perairan Malaysia dengan melanggar syarat-syarat yang boleh diterima yang ditentukan di bawah seksyen 21.
- (2) Seseorang yang melanggar seksyen-kecil (1) adalah melakukan suatu kesalahan dan boleh dikenakan denda tidak lebih daripada lima ratus ribu ringgit atau penjara tidak lebih daripada lima tahun atau kedua-duanya.

[Pin. Akta A636 : s.12 ; Pin. Akta A953 : s.15]

### **Seksyen 29A. Larangan atas pembakaran terbuka.**

- (1) Walau apa pun apa-apa yang berlawanan yang terkandung dalam Akta ini, tiada seorang pun boleh membenarkan atau menyebabkan pembakaran terbuka di mana-mana premis.
- (2) Mana-mana orang yang melanggar subseksyen (1) adalah melakukan suatu kesalahan dan, apabila disabitkan, boleh didenda tidak melebihi lima ratus ribu ringgit atau dipenjarakan selama tempoh tidak melebihi lima tahun atau kedua-duanya.
- (3) Bagi maksud subseksyen (1) -

"pembakaran terbuka" ertinya apa-apa kebakaran, pembakaran atau pembaraan yang berlaku di udara bebas dan yang tidak dihalalkan ke udara bebas itu melalui serombong atau cerobong;

"premis" termasuklah mana-mana tanah.

[Mas. Akta A1030 : s.3 : Pin. Akta A1102 : s.4]

### **Seksyen 29AA. Tidak termasuk sebagai "pembakaran terbuka".**

29AA. (1) Menteri boleh melalui perintah yang disiarkan dalam *Warta* mengisyiharkan bahawa apa-apa kebakaran, pembakaran atau pembaraan bagi maksud apa-apa aktiviti yang ditentukan dalam perintah itu bukan pembakaran terbuka sebagaimana yang ditakrifkan dalam dan bagi maksud seksyen 29A selagi aktiviti itu dijalankan mengikut atau di bawah syarat-syarat yang dinyatakan dalam perintah itu dan tidak di dalam tempat atau kawasan yang ditentukan dalam perintah itu.

(2) Walaupun apa-apa kebakaran, pembakaran atau pembaraan tidak termasuk dalam takrif pembakaran terbuka di bawah subseksyen (1) atau bahawa ia adalah bagi maksud apa-apa aktiviti yang ditentukan dalam perintah yang dibuat di bawah subseksyen (1), tiada seorang pun boleh membenarkan atau menyebabkan kebakaran, pembakaran atau pembaraan itu berlaku di dalam mana-mana kawasan jika Ketua Pengarah memberitahu, dengan apa-apa cara dan mengikut apa-apa kaedah yang difikirkannya suaimanfaat,—

(a) bahawa kualiti udara di dalam kawasan itu telah mencapai tahap yang tidak sihat; dan

(b) bahawa kebakaran, pembakaran atau pembaraan bagi maksud apa-apa aktiviti selain aktiviti yang ditentukan dalam pemberitahuan itu akan membahayakan alam sekeliling.

(3) Sebagai tambahan kepada hal keadaan yang disebut dalam subseksyen (2), Menteri boleh melalui perintah yang disiarkan dalam *Warta* menentukan hal keadaan yang tiada seorang pun boleh menyebabkan apa-apa kebakaran, pembakaran atau pembaraan bagi maksud apa-apa aktiviti yang ditentukan dalam perintah itu berlaku walaupun kebakaran, pembakaran atau pembaraan itu tidak termasuk dalam takrif pembakaran terbuka di bawah subseksyen (1) atau bahawa ia bagi maksud apa-apa aktiviti yang ditentukan dalam perintah yang dibuat di bawah subseksyen (1).

[Mas. Akta A1102 : s.5]

## **Seksyen 29B. Pemunya atau penduduk premis bertanggungjawab bagi pembakaran terbuka.**

Jika pembakaran terbuka berlaku di mana-mana premis -

(a) pemunya; atau

(b) penduduk,

premis itu yang mempunyai kawalan atas premis itu adalah disifatkan telah melanggar subseksyen 29A (1) melainkan jika dibuktikan selainnya.

[Mas. Akta A1030 : s.3]

## **Seksyen 29C. Pembelaan**

Dalam apa-apa pendakwaan di bawah seksyen 29A atau 29B, adalah menjadi pembelaan jika orang, pemunya atau penduduk premis membuktikan-

(a) bahawa pembakaran terbuka itu berlaku di luar kawalannya atau tanpa pengetahuan atau pemberian atau persetujuannya; atau

(b) bahawa dia -

(i) mengambil segala langkah berjaga-jaga yang munasabah; atau

(ii) menjalankan segala usaha yang wajar,

untuk mencegah perlakuan kesalahan yang sepatutnya diambil dan dilaksanakan olehnya dengan mengambil kira jenis tanggungjawab atas sifat itu dan kepada segala hal keadaan.

[Mas. Akta A1030 : s.3]

### **Seksyen 30. Kuasa untuk mlarang penggunaan apa-apa bahan atau kelengkapan.**

Menteri, selepas berunding dengan Majlis, boleh dengan perintah yang disiarkan dalam *Warta* -

- (a) mlarang penggunaan apa-apa bahan untuk apa-apa proses, tred atau perindustrian ;
- (b) mlarang samada mengikut perihal atau mengikut jenama penggunaan apa-apa kelengkapan atau loji perindustrian,

dalam kawasan-kawasan yang dinyatakan dalam perintah itu.

### **Seksyen 30A. Kuasa untuk mengawal penggunaan benda dan keluaran dan menyatakan pelabelan alam sekeliling.**

(1) Menteri, selepas berunding dengan Majlis, boleh dengan perintah yang disiarkan dalam *Warta* -

- (a) menetapkan apa-apa benda sebagai benda berbahaya kepada alam sekeliling yang menghendaki benda itu dikurangkan, dikitar, didapatkan atau dikawal mengikut cara yang dinyatakan dalam perintah itu; dan
- (b) menetapkan apa-apa keluaran sebagai keluaran yang ditetapkan untuk jualan dan bahawa keluaran itu hendaklah mengandungi peratusan minimum benda-benda yang dikitar dan mempunyai kenyataan yang sesuai tentang juzuk dikitar, kaedah pengilangan dan pelupusannya.

(2) Mana-mana perintah yang dibuat di bawah subseksyen (1) boleh menyatakan kaedah-kaedah tentang penggunaan, rekabentuk dan pemakaian label yang berkaitan dengan penjualan benda atau keluaran yang diperakukan sebagai tidak memudaratkan alam sekeliling.

(3) Mana-mana orang yang tidak atau enggan mematuhi perintah yang dibuat di bawah subseksyen (1) adalah melakukan suatu kesalahan dan boleh didenda tidak melebihi lima puluh ribu ringgit atau dipenjarakan selama tempoh tidak melebihi lima tahun atau kedua-duanya.

**Seksyen 30B. Kuasa untuk menyatakan kaedah-kaedah mengenai skim deposit dan rebet.**

Menteri, selepas berunding dengan Majlis, boleh menyatakan garis panduan dan prosedur mengenai skim deposit dan rebet berhubungan dengan pelupusan keluaran yang dianggap -

- (a) memudarangkan alam sekeliling; atau
- (b) menyebabkan kekangan bertentangan terhadap alam sekeliling,

bagi maksud memungut keluaran itu dengan berkesan bagi memastikan kitaran atau pelupusan keluaran itu dibuat dengan cara yang baik kepada alam sekeliling.

[Mas. Akta A953 : s.16]

**Seksyen 31. Kuasa menghendaki pemunya atau penduduk memasang, mengendali, membaiki, dsb.**

(1) Jika mana-mana benda yang berbahaya kepada alam sekeliling, pencemar atau buangan sedang atau mungkin akan dikeluarkan, dilepaskan atau diletakkan daripada mana-mana kenderaan, kapal atau premis, tanpa mengira sama ada kenderaan, kapal atau premis itu adalah yang ditetapkan di bawah seksyen 18 atau selainnya, atau daripada mana-mana pesawat udara, Ketua Pengarah boleh dengan notis secara bertulis menghendaki pemunya atau penduduk kenderaan, kapal atau premis, atau pesawat udara itu, untuk-

- (a) memasang dan mengendalikan apa-apa kelengkapan kawalan atau kelengkapan kawalan tambahan;
- (b) membaiki, mengubah atau mengganti apa-apa kelengkapan atau kelengkapan kawalan;
- (c) mendirikan atau meninggikan lagi apa-apa cerobong;

- (d) mengukur, mengambil sampel, menganalisa, merekod dan melaporkan apa-apa benda berbahaya kepada alam sekeliling, pencemar, buangan, pengaliran atau keluaran yang mengandungi pencemar;
- (e) menjalankan suatu kajian ke atas apa-apa risiko alam sekeliling;
- (f) memasang, menyenggara dan mengendalikan suatu program pengawasan atas perbelanjaan pemunya atau penduduk; atau
- (g) mengambil apa-apa langkah untuk mengurangkan, meringankan, menyuraikan, menghilangkan, membasmi, membinasa atau melupuskan pencemaran,

dalam tempoh dan mengikut cara yang dinyatakan dalam notis itu.

(2) Walau apa pun apa-apa peruntukan lain yang berlawanan, Ketua Pengarah boleh melalui notis mengarahkan pemunya atau penduduk mana-mana kenderaan, kapal, atau premis, atau pesawat udara untuk mengeluarkan, melepaskan atau meletakkan benda berbahaya kepada alam sekeliling, pencemar atau buangan pada waktu siang yang ditentukannya dan boleh secara amnya mengarahkan cara yang baginya pemunya atau penduduk itu hendaklah menjalankan tred, industri atau proses atau mengendalikan apa-apa kelengkapan, loji perindustrian atau kelengkapan kawalan di dalamnya.

(3) Mana-mana orang yang melanggar notis yang dikeluarkan di bawah subseksyen (1) atau (2) adalah melakukan suatu kesalahan dan boleh didenda tidak melebihi dua puluh lima ribu ringgit atau dipenjarakan selama tempoh tidak melebihi dua tahun atau kedua-duanya dan denda selanjutnya tidak melebihi satu ribu ringgit sehari bagi tiap-tiap hari kesalahan itu diteruskan selepas penyampaian notis yang dinyatakan dalam subseksyen (1) atau (2).

[Gan. Akta A953 : s.17]

### **Seksyen 31A. Perintah larangan, dsb.**

(1) Menteri, selepas berunding dengan Majlis, boleh melalui perintah yang disiarkan dalam *Warta* menyatakan hal keadaan yang Ketua Pengarah boleh mengeluarkan perintah larangan kepada pemunya atau penduduk mana-mana loji perindustrian atau proses perindustrian untuk mencegah pengendaliannya yang berterusan dan pelepasan benda berbahaya kepada alam sekeliling, pencemar

atau buangan sama ada secara mutlak atau bersyarat, atau bagi apa-apa tempoh yang diarahkannya, atau sehingga kehendak pemulihan yang diarahkannya telah dipatuhi.

(2) Menteri, dalam hal keadaan yang dia menganggap bahawa alam sekeliling, kesihatan awam atau keselamatan awam adalah atau kemungkinan terancam dengan serius, boleh mengarahkan Ketua Pengarah-

- (a) mengeluarkan suatu perintah yang menghendaki seseorang itu untuk memberhentikan segala perbuatan yang mengakibatkan pelepasan benda berbahaya kepada alam sekeliling, pencemar atau buangan; dan
- (b) menyebabkan dan menjadikan apa-apa jentera, kelengkapan, loji atau proses orang itu tak boleh beroperasi.

(3) Mana-mana orang yang melanggar subseksyen (1) atau (2) adalah melakukan suatu kesalahan dan boleh didenda tidak melebihi lima puluh ribu ringgit atau dipenjarakan selama tempoh tidak melebihi dua tahun atau kedua-duanya.

[Mas. Akta A953 : s.18]

### **Seksyen 32. Pemunya atau penduduk hendaklah menyenggara dan mengendalikan kelengkapan.**

Pemunya atau penduduk mana-mana kenderaan, kapal atau premis, tanpa mengira sama ada kenderaan, kapal atau premis itu adalah yang ditetapkan di bawah seksyen 18 atau selainnya, atau pesawat udara hendaklah menyenggara apa-apa kelengkapan atau kelengkapan kawalan yang dipasang pada kenderaan, kapal atau premis itu, atau pesawat udara itu dalam keadaan yang baik dan hendaklah mengendalikan kelengkapan itu atau kelengkapan kawalan itu dengan cara yang patut dan cekap.

[Gan. Akta A953 : s.19]

### **Seksyen 33. Kuasa bagi melarang atau mengawal orang-orang yang dilesen daripada melepaskan dsb. buangan-buangan dalam hal-hal tertentu.**

(1) Jika beberapa orang dilesen di bawah Akta ini untuk mengeluar, melepas atau meletakkan benda berbahaya kepada alam sekeliling, pencemar atau buangan-buangan ke dalam segmen atau unsur alam sekeliling yang sama dan Ketua Pengarah berpendapat bahawa tiap-tiap seorang daripada orang-orang

itu adalah mematuhi syarat-syarat leseninya tetapi walaupun demikian kesan kolektif bagi kesemua buangan itu mungkin menyebabkan bertambah buruknya keadaan dalam segmen atau unsur alam sekeliling itu hingga menyentuh kesihatan, kebajikan atau keselamatan manusia atau hingga mengancam kehidupan mana-mana binatang, burung, hidupan-hidupan liar, ikan atau lain-lain hidupan-hidupan dalam air, Ketua Pengarah boleh, dengan notis yang disampaikan kepada tiap-tiap seorang pemegang lesen itu, menghendaki tiap-tiap seorang daripada mereka memberhentikan pengeluaran, pelepasan atau peletakan itu mengikut cara dan dalam tempoh yang dinyatakan dalam notis itu.

(2) Seseorang yang melanggar notis yang dikeluarkan di bawah seksyen-kecil (1) adalah melakukan suatu kesalahan dan boleh dikenakan denda yang tidak lebih daripada lima puluh ribu ringgit atau penjara tidak lebih daripada lima tahun atau kedua-duanya dan denda tambahan tidak lebih daripada satu ribu ringgit sehari bagi tiap-tiap hari kesalahan itu diteruskan selepas disampaikan kepadanya notis yang dinyatakan dalam seksyen-kecil (1).

[Pin. Akta A953 : s.20]

### **Seksyen 33A. Audit alam sekeliling.**

(1) Ketua Pengarah boleh menghendaki pemunya atau penduduk mana-mana kenderaan, kapal atau premis, tanpa mengira sama ada kenderaan, kapal atau premis itu adalah yang ditetapkan di bawah seksyen 18 atau selainnya, untuk menjalankan suatu audit alam sekeliling dan mengemukakan suatu laporan audit mengikut cara yang ditetapkan oleh Menteri melalui peraturan-peraturan yang dibuat di bawah Akta ini.

(2) Bagi maksud menjalankan audit alam sekeliling dan mengemukakan laporannya, pemunya atau penduduk yang diarahkan sedemikian hendaklah melantik kakitangan yang berkelayakan yang didaftarkan di bawah subseksyen (3).

(3) Bagi maksud seksyen ini, Ketua Pengarah hendaklah menyenggara suatu senarai kakitangan yang berkelayakan yang akan menjalankan apa-apa audit alam sekeliling dan mengemukakan laporannya.

[Mas. Akta A953 : s.21]

## **Seksyen 33B. Larangan terhadap penempatan, peletakan, dsb. buangan terjadual.**

(1) Tiada seorang pun boleh -

- (a) menempatkan, meletakkan atau melupuskan, atau menyebabkan atau membenarkan ditempatkan, diletakkan atau dilupuskan, kecuali di premis yang ditetapkan sahaja, apa-apa buangan terjadual di darat atau ke dalam perairan Malaysia;
- (b) menerima atau menghantar, atau menyebabkan atau membenarkan diterima atau dihantar apa-apa buangan terjadual di dalam atau di luar Malaysia; atau
- (c) mentransit atau menyebabkan atau atau membenarkan ditransit buangan terjadual,

tanpa terlebih dahulu mendapat apa-apa kelulusan daripada Ketua Pengarah.

(2) Ketua Pengarah boleh memberikan kelulusan bertulis sama ada tertakluk kepada syarat atau tak bersyarat.

(3) Bagi maksud Akta ini, apa-apa tindakan menerima atau menghantar, atau mentransit apa-apa buangan terjadual dengan kelulusan yang diperolehi melalui pemalsuan, salah nyataan atau fraud atau yang tidak mematuhi dengan cara yang material dengan dokumen yang relevan dalam borang yang ditetapkan, adalah suatu kesalahan.

(4) Mana-mana orang yang melanggar seksyen ini adalah melakukan suatu kesalahan dan boleh didenda tidak melebihi lima ratus ribu ringgit atau dipenjarakan selama tempoh tidak melebihi lima tahun atau kedua-duanya.

[Mas. Akta A953 : s.23]

## **Seksyen 34. Pengecualian.**

Jika Ketua Pengarah berpuashati atas permohonan seseorang yang ada mempunyai kepentingan bahawa adalah mustahak untuk berbuat demikian bagi maksud membolehkan penyiasatan atau penyelidikan yang berkaitan dengan masalah pencemaran dijalankan tanpa menyebabkan pemohon itu boleh didakwa di bawah Akta ini atau di bawah peraturan-peraturan yang dibuat di bawahnya, Ketua Pengarah boleh dengan notis secara bertulis kepada pemohon mengecualikan, kesemuanya atau

setakat yang terhad, mana-mana premis atau mana-mana kelengkapan atau loji perindustrian tertakluk kepada apa-apa syarat dan selama tempoh yang dinyatakan dalam notis itu.

### **Seksyen 34A. Laporan mengenai kesan kepada alam sekeliling akibat aktiviti yang ditetapkan.**

(1) Menteri, selepas berunding dengan Majlis, boleh dengan perintah menetapkan apa-apa aktiviti yang mungkin mempunyai kesan yang bererti pada alam sekeliling sebagai aktiviti yang ditetapkan.

(2) Sesiapa yang bermaksud hendak menjalankan apa-apa aktiviti yang ditetapkan hendaklah, sebelum apa-apa kelulusan bagi menjalankan aktiviti itu diberikan oleh pihak berkuasa meluluskan yang relevan, mengemukakan suatu laporan kepada Ketua Pengarah. Laporan itu hendaklah menurut garis panduan yang ditetapkan oleh Ketua Pengarah dan hendaklah mengandungi suatu penilaian mengenai kesan kepada alam sekeliling yang akan atau yang mungkin akan berlaku akibat aktiviti itu dan langkah-langkah yang dicadangkan akan diambil untuk mencegah, mengurangkan atau mengawal kesan-kesan yang merugikan kepada alam sekeliling.

(3) Jika Ketua Pengarah, apabila meneliti laporan dan selepas membuat siasatan yang difikirkannya perlu, berpendapat bahawa laporan itu memenuhi kehendak-kehendak subseksyen (2) dan bahawa langkah-langkah yang akan diambil untuk mencegah, mengurangkan atau mengawal kesan-kesan yang merugikan kepada alam sekitar adalah mencukupi, ia hendaklah meluluskan laporan itu, dengan atau tanpa syarat-syarat yang dilampirkan kepadanya, dan hendaklah memberitahu sewajarnya orang yang bermaksud hendak menjalankan aktiviti yang ditetapkan itu dan pihak berkuasa meluluskan yang relevan.

(4) Jika Ketua Pengarah, apabila meneliti laporan dan selepas membuat siasatan yang difikirkannya perlu, berpendapat bahawa laporan itu tidak memenuhi kehendak-kehendak subseksyen (2) atau bahawa langkah-langkah yang akan diambil untuk mencegah, mengurangkan atau mengawal kesan-kesan yang merugikan kepada alam sekitar adalah tidak mencukupi, dia tidak boleh meluluskan laporan

itu dan hendaklah memberikan sebab-sebabnya dan hendaklah memberitahu sewajarnya orang yang bermaksud menjalankan aktiviti yang ditetapkan itu dan pihak berkuasa meluluskan yang relevan:

Dengan syarat bahawa jika laporan itu tidak diluluskan ia tidaklah menghalang orang itu daripada menyemak dan mengemukakan semula laporan yang telah disemak itu kepada Ketua Pengarah bagi kelulusannya.

- (5) Ketua Pengarah boleh jika difikirkannya perlu menghendaki lebih daripada satu laporan dikemukakan kepadanya bagi kelulusannya.
- (6) Sesiapa yang bermaksud hendak menjalankan sesuatu aktiviti yang ditetapkan tidak boleh menjalankan aktiviti itu sehingga laporan yang dikehendaki dikemukakan di bawah seksyen ini kepada Ketua Pengarah telah dikemukakan dan diluluskan.
- (7) Jika Ketua Pengarah meluluskan laporan itu, orang yang menjalankan aktiviti yang ditetapkan itu, dalam proses menjalankan aktiviti itu, hendaklah memberikan bukti yang cukup bahawa syarat-syarat yang dilampirkan kepada laporan itu (jika ada) sedang dipatuhi dan bahawa langkah-langkah yang dicadangkan diambil untuk mencegah, mengurangkan atau mengawal kesan-kesan yang merugikan kepada alam sekeliling sedang digabungkan ke dalam rekabentuk, pembinaan dan pengendalian aktiviti yang ditetapkan itu.
- (8) Seseorang yang melanggar seksyen ini adalah melakukan suatu kesalahan dan boleh dikenakan denda tidak lebih daripada satu ratus ribu ringgit atau penjara selama tempoh tidak lebih daripada lima tahun atau kedua-duanya dan denda tambahan satu ribu ringgit bagi tiap-tiap hari kesalahan itu diteruskan selepas disampaikan kepadanya suatu notis yang diberi oleh Ketua Pengarah menghendaknya mematuhi tindakan yang dinyatakan di dalamnya itu.

[Mas. Akta A636 : s.13 ; Pin. Akta A953 : s.21]

#### **BAHAGIAN IVA - KAWALAN BUANGAN TERJADUAL**

#### **Seksyen 34B. Larangan terhadap penempatan, peletakan, dsb. buangan terjadual.**

- (1) Tiada seorang pun boleh-
- menempatkan, meletakkan atau melupuskan, atau menyebabkan atau membenarkan ditempatkan, diletakkan atau dilupuskan, kecuali di premis yang ditetapkan sahaja, apa-apa buangan terjadual di darat atau ke dalam perairan Malaysia;
  - menerima atau menghantar, atau menyebabkan atau membenarkan diterima atau dihantar apa-apa buangan terjadual di dalam atau di luar Malaysia; atau
  - mentransit atau menyebabkan atau membenarkan ditransit buangan terjadual,

tanpa terlebih dahulu mendapat apa-apa kelulusan daripada Ketua Pengarah.

(2) Ketua Pengarah boleh memberikan kelulusan bertulis sama ada tertakluk kepada syarat atau tak bersyarat.

(3) Bagi maksud Akta ini, apa-apa tindakan menerima atau menghantar, atau mentransit apa-apa buangan terjadual dengan kelulusan yang diperolehi melalui pemalsuan, salah nyataan atau fraud atau yang tidak mematuhi dengan cara yang material dengan dokumen yang relevan dalam borang yang ditetapkan, adalah suatu kesalahan.

(4) Mana-mana orang yang melanggar seksyen ini adalah melakukan suatu kesalahan dan boleh didenda tidak melebihi lima ratus ribu ringgit atau dipenjarakan selama tempoh tidak melebihi lima tahun atau kedua-duanya.

[Mas. Akta A953 : s.23]

## **BAHAGIAN V - RAYUAN DAN LEMBAGA RAYUAN**

### **Seksyen 35. Rayuan.**

(1) Seseorang yang terkilan dengan -

(a) sesuatu keengganinan meluluskan sesuatu lesen atau pemindahmilikan sesuatu lesen;

(b) pengenaan apa-apa syarat, had atau sekatan ke atas lesenya;

(c) pembatalan, penggantungan atau pengubahan lesenya;

(d) amaun yang dikehendaki dibayar olehnya di bawah seksyen 47;

(e) apa-apa keputusan Ketua Pengarah di bawah subseksyen (3) atau (4) seksyen 34A; dan

(f) apa-apa keputusan Ketua Pengarah atau mana-mana pegawai di bawah subseksyen (2) atau (5) seksyen 48A.

boleh merayu kepada Lembaga Rayuan dalam tempoh dan mengikut cara yang ditetapkan.

(2) Lembaga Rayuan boleh, selepas mendengar Ketua Pengarah dan perayu-perayu itu, membuat apa-apa perintah yang difikirkannya patut.

[Mas. Akta A636 : s.14]

## **Seksyen 36. Lembaga Rayuan.**

(1) Bagi maksud Akta ini maka hendaklah dilantik suatu Lembaga Rayuan terdiri daripada tiga orang ahli, seorang daripadanya hendaklah menjadi Pengerusi (kemudian daripada ini dalam seksyen ini disebut sebagai Pengerusi).

(2) Maka hendaklah juga ada seorang Timbalan Pengerusi Lembaga Rayuan (kemudian daripada ini dalam seksyen ini disebut sebagai Timbalan Pengerusi) yang hanya akan berkhidmat dalam Lembaga Rayuan jika Pengerusi tidak berupaya menjalankan tugas-tugasnya oleh kerana sakit, tidak ada di Persekutuan atau oleh apa-apa juga sebab yang lain; dan apabila Timbalan Pengerusi berkhidmat dalam Lembaga Rayuan di bawah hal keadaan yang tersebut di atas ia hendaklah menjalankan tugas-tugas Pengerusi.

(3) Pengerusi dan Timbalan Pengerusi hendaklah orang-orang yang dinamakan oleh Ketua Hakim Negara dari antara orang-orang yang telah menjadi peguambela dan peguamcara Mahkamah Tinggi di Malaysia atau anggota perkhidmatan kehakiman dan undang-undang Persekutuan selama tempoh tujuh tahun sebelum penamaan itu dan mereka hendaklah dilantik melalui suatu pemberitahu dalam *Warta* oleh Menteri selama tempoh tidak lebih daripada tiga tahun; dan seseorang yang dilantik sedemikian adalah layak untuk dilantik semula.

(4) (a) Pengerusi boleh meminta mana-mana dua orang ahli daripada suatu panel orang-orang yang dilantik oleh Menteri melalui pemberitahu dalam *Warta* untuk berkhidmat dalam Lembaga Rayuan;

(b) Perlantikan seseorang ahli, lain daripada Pengerusi dan Timbalan Pengerusi, ialah selama tempoh tiga tahun melainkan jika ia meletakkan jawatan terlebih dahulu atau perlantikannya dibatalkan terlebih dahulu.

(5) Menteri boleh membatalkan perlantikan Pengerusi atau Timbalan Pengerusi atau perlantikan ahli-ahli yang lain itu tanpa memberi apa-apa sebab.

- (6) Seseorang ahli Lembaga Rayuan yang ada mempunyai sesuatu kepentingan dalam apa-apa perkara yang dibentangkan di hadapan Lembaga hendaklah menzahirkan kepada Lembaga Rayuan nyataan mengenai kepentingannya dan jenis kepentingannya itu, dan penzahiran itu hendaklah direkodkan dan ahli itu tidak boleh mengambil apa-apa bahagian dalam apa-apa pembicaraan Lembaga Rayuan berhubung dengan perkara itu.
- (7) Tiap-tiap keputusan Lembaga Rayuan hendaklah dibuat oleh Pengerusi Lembaga Rayuan selepas menimbangkan pendapat dua orang ahli yang lain itu tetapi dalam membuat keputusannya Pengerusi tidak terikat menurut pendapat dua orang ahli yang lain itu atau pendapat salah seorang daripada mereka dengan syarat bahawa Pengerusi hendaklah merekodkan sebab-sebabnya mengapa ia tidak bersetuju dengan pendapat itu.
- (8) Sebagai tambahan kepada segala kuasa yang diberi kepada Lembaga Rayuan di bawah Akta ini, Lembaga Rayuan adalah juga mempunyai kuasa untuk mengaward kos atau membuat apa-apa perintah berkenaan dengan sesuatu rayuan di hadapannya.
- (9) Kaedah-kaedah mengenai acara bagi pembicaraan rayuan di bawah Akta ini hendaklah mengikut, setakat mana yang boleh dipakai, Kaedah-kaedah Mahkamah Rendah dan Pengerusi hendaklah menyimpan suatu rekod mengenai rayuan di hadapannya.
- (10) Seseorang ahli adalah berhak kepada saraan atau elaun yang ditetapkan oleh Menteri.

## **BAHAGIAN VA - PEMBAYARAN SES DAN KUMPULAN WANG ALAM SEKELILING**

### **Seksyen 36A. Ses penyelidikan.**

- (1) Bagi maksud menjalankan, menggalakkan atau menyelaraskan penyelidikan berhubungan dengan apa-apa aspek pencemaran atau pencegahannya, Menteri boleh, selepas berunding dengan Menteri Kewangan dan Majlis, membuat suatu perintah bagi pengenaan dan pemungutan, atau pengubahan atau pembatalan pengenaan, suatu ses ke atas buangan yang dihasilkan.
- (2) Apa-apa perintah yang dibuat di bawah subseksyen (1) boleh mengadakan peruntukan -
- (a) bagi kadar ses berlainan yang hendak dikenakan berkenaan dengan jenis berlainan buangan yang dihasilkan termasuklah isipadu dan komposisi buangan;

- (b) bagi cara pemungutan ses oleh Ketua Pengarah; dan
  - (c) bagi pengecualian mana-mana orang atau golongan orang, atau berkenaan dengan apa-apa buangan yang dihasilkan selain daripada bagi maksud penyelidikan, daripada pembayaran ses.
- (3) Ses yang dipungut di bawah seksyen ini hendaklah dibayar ke dalam Kumpulan Wang yang ditubuhkan di bawah seksyen 36B.

[Mas. Akta A953 : s.25]

### **Seksyen 36B. Penubuhan Kumpulan Wang Alam Sekeliling.**

- (1) Maka hendaklah ditubuhkan suatu kumpulan wang yang hendaklah dikenali sebagai Kumpulan Wang Alam Sekeliling yang hendaklah dikendalikan sebagai Akaun Amanah dalam Kumpulan Wang Disatukan Persekutuan.
- (2) Kumpulan Wang itu hendaklah terdiri daripada -
  - (a) apa-apa jumlah wang yang diperuntukkan dari semasa ke semasa oleh Kerajaan;
  - (b) segala derma dan sumbangan yang diterima dari dalam atau luar Malaysia;
  - (c) segala wang yang dibayar atau diterima oleh Ketua Pengarah daripada ses yang dikenakan atau dipungut mengikut seksyen 36A; dan
  - (d) segala wang yang dibayar atau diterima mengikut seksyen 36D.

[Mas. Akta A953 : s.25]

### **Seksyen 36C. Jawatankuasa Kumpulan Wang Alam Sekeliling.**

- (1) Maka hendaklah ditubuhkan suatu jawatankuasa yang dikenali sebagai Jawatankuasa Kumpulan Wang Alam Sekeliling yang hendaklah mempunyai kawalan pada Kumpulan Wang itu.

(2) Jawatankuasa itu hendaklah terdiri daripada anggota yang berikut:

- (a) Ketua Pengarah yang hendaklah menjadi Pengerusi;
- (b) dua Pegawai Kanan Alam Sekeliling yang akan dilantik oleh Menteri; dan
- (c) dua pegawai alam yang akan dilantik oleh Menteri.

(3) Tiada mesyuarat Jawatankuasa boleh diadakan semasa ketiadaan Ketua Pengarah.

(4) Kourum bagi mesyuarat Jawatankuasa hendaklah tiga orang.

(5) Tertakluk kepada Akta ini, Jawatankuasa boleh menentukan prosidingnya sendiri.

[Mas. Akta A953 : s.25]

### **Seksyen 36D. Caruman ke dalam Kumpulan Wang.**

Menteri, selepas berunding dengan Majlis, boleh menghendaki mana-mana orang yang terlibat dalam-

- (a) penerokaan, pengeluaran, penapisan, penghasilan, pergerakan pukal, pengagihan atau penstoran minyak;
- (b) penghasilan, pergerakan pukal, pengagihan atau penstoran, benda berbahaya kepada alam sekeliling; atau
- (c) pergerakan pukal atau penstoran, buangan,

mencarum ke dalam Kumpulan Wang pada kadar yang dinyatakannya.

[Mas. Akta A953 : s.25]

## **Seksyen 36E. Pemakaian Kumpulan Wang.**

Kumpulan Wang itu hendaklah ditadbirkan bagi maksud -

- (a) menjalankan, menggalakkan dan menyelaraskan penyelidikan berhubungan dengan apa-apa aspek pencemaran atau pencegahannya;
- (b) memulihkan buangan, atau menghilangkan, menyuraikan, memusnahkan, membersihkan, melupuskan atau mengurangkan pencemaran;
- (c) mencegah atau memerangi kejadian yang berikut:
  - (i) tumpahan, pelepasan atau lambakan, minyak;
  - (ii) pelepasan, peletakan atau lambakan, benda berbahaya kepada alam sekeliling; atau
  - (iii) pelepasan, peletakan atau lambakan, buangan; dan
- (d) menggalakkan langkah-langkah pemuliharaan terhadap apa-apa kerosakan yang mungkin disebabkan oleh mana-mana kejadian yang dinyatakan di bawah subperenggan (i), (ii) atau (iii) perenggan (c).

[Mas. Akta A953 : s.25]

## **BAHAGIAN VI – PELBAGAI**

### **Seksyen 37. Pemunya atau penduduk hendaklah memberi maklumat.**

(1) Ketua Pengarah boleh melalui notis menghendaki pemunya atau penduduk mana-mana kenderaan, kapal, premis atau pesawat udara untuk memberikan kepadanya dalam tempoh yang dinyatakan dalam notis itu maklumat berhubungan dengan-

- (a) pemunyaan kenderaan, kapal, premis atau pesawat udara itu;

- (b) penggunaan bahan mentah, benda berbahaya kepada alam sekeliling, atau apa-apa proses, kelengkapan, kelengkapan kawalan atau loji perindustrian yang terdapat pada kenderaan, kapal, premis atau pesawat udara itu;
  - (c) apa-apa benda berbahaya kepada alam sekeliling, pencemar atau buangan yang dilepaskan atau berkemungkinan dilepaskan daripadanya; atau
  - (d) apa-apa risiko alam sekeliling yang berkemungkinan berlaku akibat daripada penggunaan bahan mentah, benda berbahaya kepada alam sekeliling atau proses.
- (2) Apabila seseorang dikehendaki oleh Ketua Pengarah menjawab sesuatu soalan atau memberi sesuatu maklumat dan orang itu tidak menjawab soalan itu atau tidak memberi maklumat itu sebagaimana dikehendaki atau memberi sesuatu jawapan atau maklumat yang palsu atau mengelirukan tentang sesuatu perkara matan maka orang itu adalah melakukan suatu kesalahan dan boleh dikenakan denda tidak lebih daripada dua ribu ringgit atau penjara tidak lebih daripada enam bulan atau kedua-duanya.

[Gan. Akta A953 : s.26]

### **Seksyen 38. Kuasa untuk menahan, menaiki, menggelidah, dsb.**

(1) Jika Ketua Pengarah atau mana-mana pegawai yang diberikuasa sewajarnya secara bertulis, berpuas hati, atau mempunyai sebab untuk mempercayai bahawa mana-mana orang telah melakukan suatu kesalahan di bawah Akta ini, dia boleh, jika pada pendapatnya adalah perlu untuk berbuat demikian bagi maksud menyiasat kesalahan itu, tanpa waran, menahan, menaiki dan menggelidah mana-mana kenderaan, kapal atau pesawat udara, atau memasuki mana-mana premis, tanpa mengira sama ada kenderaan, kapal atau premis itu adalah yang ditetapkan di bawah seksyen 18 atau selainnya, dan boleh-

- (a) menyiasat, memeriksa, menyita atau menahan apa-apa kelengkapan, komputer atau loji perindustrian;
- (b) menyiasat, memeriksa, menyita atau menahan apa-apa buku, rekod, lesen, permit, perakuan atau dokumen berhubungan dengan-

- (i) pelaksanaan atau penggunaan kelengkapan atau loji perindustrian itu;
  - (ii) benda berbahaya kepada alam sekeliling, pencemar atau buangan; atau
  - (iii) apa-apa hal yang dikehendaki di bawa atas kenderaan, kapal atau pesawat udara di bawah mana-mana undang-undang bertulis lain;
- (c) menyiasat, memeriksa, menyita atau menahan apa-apa buangan terjadual atau benda berbahaya kepada alam sekeliling dan mana-mana kenderaan atau kapal yang digunakan dalam pembawa buangan terjadual atau benda berbahaya kepada alam sekeliling;
- (d) membuat pertanyaan dan pemeriksaan fizikal atas kapal, kelengkapan, peralatan, stor dan kargo sebagaimana yang perlu;
- (e) membuat salinan, atau mengambil cabutan daripada, mana-mana buku, rekod atau dokumen yang disita dan ditahan sedemikian;
- (f) menyiasat, memeriksa atau mengambil sampel mana-mana benda, bahan atau hal yang digunakan, berkemungkinan digunakan atau biasanya digunakan dalam mana-mana tred, industri atau proses yang dijalankan dalam atau di atas kenderaan, kapal, premis, atau pesawat udara itu; atau
- (g) mengambil sampel mana-mana benda berbahaya kepada alam sekeliling, pencemar atau buangan yang dikeluarkan, dilepaskan atau diletakkan, atau berkemungkinan dikeluarkan, dilepaskan atau diletakkan daripada kenderaan, kapal, premis, atau pesawat udara itu.

[Mas. Akta A953 : s.27]

### **Seksyen 38A. Kuasa untuk memeriksa orang yang mengetahui kes.**

- (1) Ketua Pengarah atau mana-mana pegawai yang diberikuasa sewajarnya secara bertulis olehnya dalam menjalankan penyiasatan di bawah Akta ini boleh memeriksa secara lisan mana-mana orang yang dijangkakan mengetahui fakta dan hal keadaan kes itu dan hendaklah mengubah dalam bentuk bertulis apa-apa pernyataan yang dibuat oleh orang yang diperiksa sedemikian.

(2) Orang yang disebut dalam subseksyen (1) adalah terikat untuk menjawab semua soalan berhubungan dengan kes itu yang diajukan kepadanya oleh Ketua Pengarah atau mana-mana pegawai yang diberikuasa secara bertulis olehnya:

Dengan syarat bahawa orang itu boleh enggan menjawab apa-apa soalan yang jawapannya mungkin berkecenderungan mendedahkannya kepada suatu pertuduhan jenayah atau penalti atau pelucutahan.

(3) Seseorang yang membuat pernyataan di bawah seksyen ini adalah terikat di sisi undang-undang untuk menyatakan yang benar, sama ada atau tidak pernyataan itu dibuat secara keseluruhannya atau sebahagiannya sebagai jawapan kepada soalan-soalan itu.

(4) Ketua Pengarah, atau mana-mana pegawai yang diberikuasa sewajarnya secara bertulis olehnya, dalam memeriksa seseorang di bawah subseksyen (1) hendaklah terlebih dahulu memberitahu orang itu tentang peruntukan subseksyen (2) dan (3).

(5) Suatu pernyataan yang dibuat oleh seseorang di bawah seksyen ini hendaklah, bila-bila masa mungkin, diubah ke dalam bentuk bertulis dan ditandatangani oleh orang yang membuatnya atau dicapkan dengan ibu jarinya, mengikut mana-mana yang berkenaan, selepas pernyataan itu dibacakan kepadanya dalam bahasa pernyataan itu dibuatnya dan selepas dia diberi peluang untuk membuat apa-apa pembetulan yang dia mahu, dan jika orang yang diperiksa itu enggan menandatangani atau mengecapkan cap ibu jarinya pada pernyataan itu, Ketua Pengarah atau mana-mana pegawai yang diberikuasa sewajarnya secara bertulis olehnya hendaklah mengendorskan padanya di bawah tandatangannya fakta keengganan itu dan sebabnya, jika ada, sebagaimana yang dinyatakan oleh orang yang diperiksa itu.

[Gan. Akta A953 : s.28]

### **Seksyen 39. Penyampaian notis.**

(1) Tiap-tiap notis, perintah, saman atau suratan yang dikehendaki atau dibenarkan oleh Akta ini atau oleh mana-mana peraturan yang dibuat di bawahnya supaya disampaikan kepada seseorang boleh disampaikan -

(a) dengan menyerahkannya kepada orang itu atau dengan menyerahkannya kepada seseorang ahli atau penjawat keluarganya yang dewasa;

(b) dengan meninggalkannya di tempat tinggal atau tempat urusan orang itu yang biasa atau yang akhir diketahui dalam suatu sampul yang dialamatkan kepada orang itu; atau

(c) dengan menghantarnya melalui pos berdaftar dalam sampul yang telah dijelaskan bayaran

dan dialamatkan kepada orang itu di tempat tinggal atau tempat urusan orang itu yang biasa atau yang akhir diketahui.

(2) Sesuatu notis, perintah, saman atau suratan yang dikehendaki atau dibenarkan oleh Akta ini atau oleh mana-mana peraturan yang dibuat di bawahnya supaya disampaikan kepada pemunya atau penduduk mana-mana premis hendaklah disifatkan sebagai dialamatkan dengan sepatutnya jika dialamatkan mengikut perihal "pemunya" atau "penduduk" premis itu tanpa nama atau perihal tambahan.

(3) Sesuatu notis, perintah, saman atau urusan yang dikehendaki atau dibenarkan oleh Akta ini atau oleh mana-mana peraturan yang dibuat di bawahnya supaya disampaikan kepada pemunya atau penduduk mana-mana premis boleh disampaikan dengan menyerahkannya atau suatu salinannya yang benar kepada seseorang yang dewasa di premis itu atau, jika tidak ada seseorang seperti itu di premis itu yang kepadanya yang demikian boleh dengan usaha yang menasabah diserahkan, dengan menampalkan notis, perintah, saman atau suratan itu di sesuatu tempat yang mudah dilihat di premis itu.

## **Seksyen 40. Keterangan.**

(1) Kandungan bagi sesuatu suratan yang disedia, dikeluar atau disampaikan di bawah, menurut, atau bagi maksud-maksud Akta ini hendaklah dianggap sebagai betul sehingga dibuktikan sebaliknya dan pengemukaan apa-apa buku yang berupa sebagai menunjukkan lesen-lesen yang dikeluarkan di bawah Akta ini adalah menjadi bukti *prima facie* mengenai pengeluaran, tidak adanya pengeluaran atau tarikh tamatnya tempoh lesen-lesen itu.

(2) Walau apapun undang-undang lain yang berlawanan, dalam sesuatu pembicaraan di bawah Akta ini atau di bawah peraturan-peraturan yang dibuat dibawahnya sesuatu perakuan bagi maksud menentukan penduduk bagi mana-mana premis atau mana-mana premis yang ditetapkan, mengikut mana yang berkenaan, yang berupa sebagai ditandatangani oleh Pemungut Hasil Tanah adalah menjadi keterangan mengenai apa-apa nyataan yang dinyatakan di dalamnya melainkan jika dibuktikan sebaliknya.

(3) Jika dalam sesuatu pembicaraan atas kesalahan-kesalahan terhadap Akta ini atau terhadap peraturan-peraturan yang dibuat di bawahnya adalah perlu dibuktikan bahawa seseorang adalah dilesen atau tidak dilesen pada sesuatu tarikh tertentu atau selama sesuatu tempoh tertentu atau bahawa sesuatu lesen adalah tertakluk kepada sesuatu syarat, had atau sekatan yang ditentukan atau bahawa

sesuatu lesen telah digantung dalam masa sesuatu tempoh tertentu, maka suatu perakuan bertulis yang berupa sebagai ditandatangani oleh Ketua Pengarah menyatakan bahawa orang itu adalah dilesen atau tidak dilesen pada tarikh itu atau menyatakan sesuatu syarat, had atau sekatan yang kepadanya sesuatu lesen yang dikeluarkan kepada orang itu adalah tertakluk atau selama atau dalam masa tempoh itu atau bahawa lesen orang itu telah digantung dalam masa tempoh itu adalah menjadi keterangan *prima facie* mengenai nyataan yang dinyatakan di dalamnya dan Ketua Pengarah tidak boleh diperiksabolas mengenai kandungan perakuan itu melainkan jika suatu notis telah disampaikan kepadanya sepuluh hari terlebih dahulu menyatakan cadangan hendak berbuat demikian itu dan selanjutnya menyatakan butir-butir yang dicadang hendak dicabar itu.

#### **Seksyen 41. Penalty yang tidak diperuntukan bagi kesalahan-kesalahan.**

Tiap-tiap ketinggalan atau kecuaian daripada mematuhi, dan tiap-tiap perbuatan yang dilakukan atau dicuba hendak dilakukan berlawanan dengan, peruntukan-peruntukan Akta ini atau mana-mana peraturan yang dibuat di bawahnya atau apa-apa pelanggaran terhadap syarat-syarat dan sekatan-sekatan yang tertakluk kepadanya, atau yang atasnya, sesuatu lesen adalah dikeluarkan di bawah Akta ini atau terhadap mana-mana peraturan yang dibuat di bawahnya adalah menjadi suatu kesalahan terhadap Akta ini dan berkenaan dengan mana-mana kesalahan itu yang baginya tiada apa-apa penalti diperuntukkan dengan nyata, pesalah itu boleh dikenakan denda tidak lebih daripada sepuluh ribu ringgit atau penjara tidak lebih daripada dua tahun atau kedua-duanya.

[Pin. Akta A953 : s.29]

#### **Seksyen 42. Percubaan dan persubahatan.**

Barang siapa mencuba melakukan sesuatu kesalahan yang boleh dihukum di bawah Akta ini atau di bawah mana-mana peraturan yang dibuat di bawahnya atau bersubahat melakukan kesalahan itu hendaklah dihukum dengan hukuman yang diperuntukkan bagi kesalahan itu.

#### **Seksyen 43. Kesalahan-kesalahan oleh kumpulan-kumpulan orang dan oleh penjawat-penjawat dan ejen-ejen.**

(1) Jika sesuatu kesalahan terhadap Akta ini atau terhadap mana-mana peraturan yang dibuat di bawahnya telah dilakukan oleh sesuatu syarikat, firma, pertubuhan atau lain-lain kumpulan orang,

seseorang yang pada masa berlakunya kesalahan itu adalah seorang pengarah, pengurus atau lain-lain pegawai yang seumpamanya atau seseorang kongsi bagi syarikat, firma, pertubuhan atau lain-lain kumpulan orang itu atau yang berupa sebagai bertugas dalam jawatan itu hendaklah disifatkan sebagai bersalah atas kesalahan itu melainkan jika ia membuktikan bahawa kesalahan itu telah dilakukan tanpa dipersetujui atau dibiarkan olehnya dan bahawa ia telah menjalankan segala usaha yang patut dijalankan olehnya memandang kepada jenis tugas-tugasnya dalam jawatan itu dan kepada segala hal keadaan bagi mencegah berlakunya kesalahan itu.

(2) Apabila juga dibuktikan dengan memuaskan hati mahkamah bahawa suatu pelanggaran terhadap peruntukan-peruntukan Akta ini atau terhadap mana-mana peraturan yang dibuat di bawahnya telah dilakukan oleh seseorang kerani, penjawat atau ejen apabila bertindak dalam masa menjalankan pekerjaannya, maka prinsipalnya hendaklah juga bertanggungan atas pelanggaran itu dan boleh dikenakan penalti yang diperuntukkan bagi pelanggaran itu melainkan jika ia membuktikan dengan memuaskan hati mahkamah bahawa pelanggaran itu telah dilakukan tanpa pengetahuan atau persetujuannya atau bahawa ia telah menjalankan segala usaha untuk mencegah pelanggaran itu dan untuk memastikan pematuhan peruntukan-peruntukan itu :

Dengan syarat bahawa tiada apa-apa juga dalam seksyen ini boleh disifatkan sebagai mengecualikan kerani, penjawat atau ejen itu daripada tanggungan mengenai penalti yang diperuntukkan oleh Akta ini atau oleh peraturan-peraturan yang dibuat di bawahnya bagi apa-apa pelanggaran yang dibuktikan sebagai telah dilakukan olehnya.

#### **Seksyen 44. Pendakwaan.**

Tiada pendakwaan boleh dimulakan bagi suatu kesalahan di bawah Akta ini atau peraturan-peraturan yang dibuat di bawahnya tanpa keizinan bertulis Pendakwa Raya.

[Mas. Akta A1030 : s.4]

#### **Seksyen 45. Mengkompaun kesalahan-kesalahan.**

(1) Ketua Pengarah atau mana-mana Timbalan Ketua Pengarah, atau mana-mana pegawai awam lain atau mana-mana pihak berkuasa tempatan yang kepadanya Ketua Pengarah telah mewakilkan apa-apa kuasa secara bertulis, boleh mengkompaun mana-mana kesalahan di bawah Akta ini atau peraturan-peraturan yang dibuat di bawahnya yang ditetapkan oleh Menteri sebagai kesalahan yang boleh dikompaun dengan menerima daripada orang semunasabinya disyaki telah melakukan kesalahan itu, sejumlah wang yang tidak melebihi dua ribu ringgit.

(2) Menteri boleh membuat kaedah-kaedah untuk menetapkan cara dan acara bagi mengkompaun kesalahan-kesalahan itu.

[Pin. Akta A636 : s.15 ; Gan. Akta A953 : s.30]

## **Seksyen 46. Mahkamah Sesyen dan Mahkamah Mejistret Klas Pertama hendaklah mempunyai bidang-kuasa.**

Walau apapun undang-undang bertulis yang berlawanan, sesuatu Mahkamah Sesyen di Malaysia Barat atau sesuatu Mahkamah Majistret Klas Pertama di Malaysia Timur adalah mempunyai bidang kuasa untuk membicarakan sesuatu kesalahan di bawah Akta ini dan untuk mengaward hukuman yang sepenuhnya bagi sesuatu kesalahan itu.

### **Seksyen 46A. Kuasa menyita kenderaan atau kapal.**

Mana-mana kenderaan atau kapal yang digunakan dalam pengangkutan atau pelupusan buangan yang berlanggaran dengan Akta ini atau peraturan-peraturan yang dibuat di bawahnya bolehlah disita oleh Ketua Pengarah sementara menanti selesainya prosiding di bawah Akta ini:

Dengan syarat bahawa Ketua Pengarah boleh melepaskan kenderaan atau kapal yang disita sedemikian itu apabila diberikan suatu bon atau sekuriti lain yang mencukupi untuk meliputi nilai kenderaan atau kapal itu.

[Mas. Akta A953 : s.31]

### **Seksyen 46B. Kuasa perlucutahkan dan pelupusan.**

Jika dibuktikan sehingga mahkamah berpuas hati bahawa kenderaan atau kapal yang disita di bawah Akta ini digunakan dalam melakukan suatu kesalahan, mahkamah hendaklah memerintahkan supaya kenderaan atau kapal itu dilucutahkan dan dilupuskan mengikut cara yang diarahkan oleh mahkamah.

[Mas. Akta A953 : s.31]

## **Seksyen 46C. Penyitaan dan perlucuthakan kenderaan atau kapal.**

- (1) Jika mana-mana kenderaan atau kapal disita di bawah Akta ini dan tiada pendakwaan dalam tempoh satu bulan kalender dari tarikh penyitaan berkenaan dengan hal itu, kenderaan atau kapal itu hendaklah disifatkan sebagai dilucuthak pada akhir tempoh itu, melainkan jika sebelum tarikh itu suatu tuntutan bertulis mengenainya dibuat mengikut cara yang dinyatakan dalam subseksyen (2), (3) dan (4).
- (2) Mana-mana orang yang menegaskan bahawa dia adalah pemunya kenderaan atau kapal yang disebut dalam subseksyen (1) dan bahawa kenderaan atau kapal itu tidak boleh dilucuthakkan boleh memberikan notis bertulis secara sendiri atau melalui ejennya yang diberikuasa secara bertulis kepada pegawai yang diberi kuasa sewajarnya secara bertulis oleh Ketua Pengarah yang dalam milikannya kenderaan atau kapal itu ditahan bahawa dia menuntut tuntutan ke atas kenderaan atau kapal itu.
- (3) Apabila diterima notis yang disebut dalam subseksyen (2) pegawai yang diberikuasa sewajarnya secara bertulis oleh Ketua Pengarah hendaklah merujuk tuntutan itu kepada Ketua Pengarah yang hendaklah mendarahkan pegawai sedemikian untuk merujuk hal itu kepada seorang Hakim Mahkamah Sesyen bagi mendapatkan keputusan.
- (4) Hakim Mahkamah Sesyen yang kepadanya hal itu dirujuk di bawah subseksyen (3) hendaklah mengeluarkan suatu saman yang menghendaki orang yang menegaskan bahawa dia adalah pemunya kenderaan atau kapal itu, dan orang yang daripadanya ia disita, untuk hadir di hadapan Hakim Mahkamah Sesyen itu, dan apabila mereka hadir atau jika mereka ingkar untuk hadir, penyampaian wajar saman itu telah dibuktikan, Hakim Mahkamah Sesyen itu hendaklah terus memeriksa perkara itu dan apabila terbukti bahawa suatu kesalahan di bawah Akta ini telah dilakukan dan bahawa kenderaan atau kapal itu yang menjadi hal perkara atau telah digunakan dalam melakukan kesalahan itu hendaklah memerintahkan supaya kenderaan atau kapal itu dilucuthakkan dan hendaklah, jika tiada bukti sedemikian, memerintahkan pelepasannya.
- (5) Mana-mana kenderaan atau kapal yang disifatkan terlucuthak atau terlucuthak di bawah seksyen ini hendaklah diserahkan kepada Ketua Pengarah dan hendaklah dilupuskan oleh Ketua Pengarah-
- (a) mengikut arahan-arahan yang diberikan oleh Hakim Mahkamah Sesyen; atau
- (b) mengikut cara yang difikirkannya patut.

## **Seksyen 46D. Tiada kos atau gantirugi berbangkit daripada penyitaan melainkan jika penyitaan dibuat tanpa sebab yang munasabah.**

Dalam mana-mana prosiding di hadapan mana-mana mahkamah berkenaan dengan mana-mana kenderaan atau kapal yang disita pada menjalankan apa-apa kuasa yang diberikan di bawah Akta ini, seseorang itu adalah tidak berhak kepada kos prosiding itu atau kepada apa-apa gantirugi atau relif lain selain daripada perintah pemulangan kenderaan atau kapal yang disita itu atau pembayaran nilainya melainkan jika penyitaan itu telah dibuat tanpa sebab yang munasabah.

[Mas. Akta A953 : s.31]

## **Seksyen 46E. Pampasan bagi kerugian atau kerosakan kepada harta.**

Setelah seseorang telah disabitkan atas suatu kesalahan terhadap Akta ini atau mana-mana peraturan yang dibuat di bawahnya, mahkamah, sebagai tambahan kepada mengenakan penalti bagi kesalahan

itu, boleh, jika mahkamah mendapati bahawa mana-mana orang lain telah, dengan sebab perlakuan, atau peninggalan yang telah mengakibatkan kesalahan itu, mengalami kerugian atau kerosakan kepada harta, memerintahkan orang yang disabitkan sedemikian untuk membayar kepada orang yang satu lagi

itu kos dan perbelanjaan yang dilakukan atau pampasan bagi kerugian atau kerosakan kepada harta dan apa-apa kos lain, dalam amaun yang mahkamah fikirkan patut.

[Mas. Akta A953 : s.31]

## **Seksyen 47. Kuasa bagi menuntut kos dan perbelanjaan.**

(1) Jika sesuatu segmen atau unsur alam sekeliling dicemari oleh seseorang bersalah dengan Akta ini atau dengan peraturan yang dibuat di bawahnya, Ketua Pengarah boleh mengambil apa-apa tindakan yang perlu bagi menghapus, menyurai, membinasa atau mengurangkan pencemaran itu dan boleh menuntut daripada orang itu segala kos dan perbelanjaan yang dilakukan berhubung dengannya.

(2) Sesuatu perakuan dari Ketua Pengarah menyatakan bahawa -

(a) ia berpendapat bahawa orang yang dinamakan dalam perakuan itu adalah bertanggungjawab atas pencemaran itu adalah menjadi keterangan *prima facie* bagi maksud apa-apa pembicaraan di bawah seksyen ini;

- (b) jumlah wang yang dilakukan bagi menjalankan segala atau mana-mana daripada kerja yang diperlukan di bawah seksyen-kecil (1) adalah menjadi bukti muktamad mengenai jumlah wang yang kena dibayar dan tidak boleh tertakluk kepada apa-apa rayuan atau ulangkaji dalam mana- mana mahkamah.
- (3) Semua dan apa-apa jumlah wang yang kena di bayar oleh orang itu hendaklah menjadi suatu pertanggungan yang pertama ke atas apa-apa harta atau kepentingan yang dipegang oleh orang itu.
- (4) Bagi maksud seksyen-seksyen 27 dan 29, jika perlepasan atau tumpahan minyak, campuran mengandungi minyak atau buangan-buangan adalah dari -
- (a) mana-mana kapal atau dua kapal atau lebih, maka pemunya kapal itu adalah bertanggungan atau pemunya-pemunya semua kapal yang berkenaan itu adalah bertanggungan bersesama dan masing-masing;
- (b) apa-apa perkakas yang digunakan bagi memindahkan minyak, campuran mengandungi minyak atau buangan ke mana-mana kapal daripada sesuatu tempat di darat, maka orang yang menjaga perkakas itu dan majikan orang itu adalah bertanggungan bersesama dan masing- masing;
- (c) sesuatu tempat di darat, maka penduduknya adalah bertanggungan.

[Pin. Akta A636 : s.16]

#### **Seksyen 48. Kuasa untuk menahan dan menjual kapal.**

- (1) Jika Ketua Pengarah mempunyai sebab untuk mempercayai bahawa apa-apa pelepasan atau tumpahan minyak atau campuran yang mengandungi minyak atau buangan terjadual adalah daripada mana-mana kenderaan atau kapal, dia boleh menahan kenderaan atau kapal itu dan kenderaan atau kapal itu boleh ditahan sehingga pemunya mendeposit dengan Kerajaan sejumlah wang atau mengemukakan apa-apa sekuriti yang, pada pandangan Ketua Pengarah, adalah cukup untuk memenuhi kos dan perbelanjaan yang akan dilakukan untuk menghilangkan atau menghapuskan minyak atau campuran yang mengandungi minyak atau buangan terjadual itu.
- (2) Jika kenderaan atau kapal yang ditahan itu terus bergerak sebelum ia dilepaskan, pemunya atau nakhodanya, atau mana-mana orang yang menyebabkan kenderaan atau kapal itu bergerak adalah melakukan suatu kesalahan dan bolehlah didenda tidak melebihi lima puluh ribu ringgit atau dipenjarakan selama tempoh tidak melebihi lima tahun atau kedua-duanya.

(3) Jika pemunya kenderaan atau kapal itu tidak berupaya membayar kos dan perbelanjaan yang dilakukan dalam menghilangkan atau menghapuskan minyak itu atau campuran yang mengandungi minyak atau buangan terjadual itu, Ketua Pengarah boleh memohon kepada mahkamah bagi penjualan kenderaan atau kapal itu dan menggunakan hasil jualan itu untuk membayar kos dan perbelanjaan bagi menghilangkan atau menghapuskan minyak atau campuran yang mengandungi minyak atau buangan terjadual itu.

[Mas. Akta A953 : s.32]

### **Seksyen 48A. Kuasa menguji dan melarang penggunaan kenderaan.**

(1) Ketua Pengarah atau mana-mana pegawai yang diberi kuasa secara bertulis dengan sempurna olehnya boleh memasuki dan memeriksa mana-mana kenderaan yang sedang digunakan dan bagi maksud itu boleh menghendaki mana-mana kenderaan diberhentikan, dan boleh menahan mana-mana kenderaan selama masa yang diperlukan bagi pemeriksaan itu, dan boleh menghendaki pemandu kenderaan itu memandu kenderaan itu ke suatu tempat lain bagi maksud pemeriksaan itu dan boleh menjalankan, atas perbelanjaan pemunya, semua ujian dan pemeriksaan yang difikirkannya patut atau perlu bagi memuaskan bahawa peruntukan-peruntukan Akta ini atau mana-mana peraturan yang dibuat

di bawahnya telah dipatuhi berkenaan dengan kenderaan itu:

Dengan syarat bahawa tiada suatu kenderaan pun boleh ditahan di bawah seksyen ini selama lebih daripada empat puluh lapan jam atau suatu tempoh yang lebih lama sebagaimana yang dibenarkan secara bertulis oleh Ketua Pengarah dalam mana-mana hal tertentu.

(2) Jika, dalam pemeriksaan itu, kelihatan kepada Ketua Pengarah atau pegawai itu bahawa, disebabkan oleh apa-apa kecacatan di dalamnya, kenderaan itu adalah atau mungkin akan melanggar Akta ini atau mana-mana peraturan yang dibuat di bawahnya, dia boleh melarang penggunaan kenderaan itu:

Dengan syarat bahawa jika pada pendapat Ketua Pengarah atau pegawai itu kecacatan itu boleh diperbaiki dalam tempoh yang tidak melebihi sepuluh hari, larangan itu tidak boleh berkuatkuasa sebelum habis tempoh itu.

(3) Jika, di bawah subseksyen (2), Ketua Pengarah atau pegawai itu melarang penggunaan sesuatu kenderaan, dia hendaklah dengan serta-merta memberikan notis larangan itu secara bertulis kepada pemunya berdaftar kenderaan itu atau orang yang bertanggungjawab atas kenderaan itu.

(4) Dalam hal larangan yang disebabkan oleh kecacatan yang dinyatakan dalam proviso kepada subseksyen (2), notis yang diberikan di bawah subseksyen (3) hendaklah menyatakan tempoh masa

kecacatan itu boleh pada pendapat pegawai itu diperbaiki dan boleh menghendaki pemunya berdaftar kenderaan itu atau orang yang bertanggungjawab atas kenderaan itu mengemukakan kenderaan itu untuk diperiksa oleh pegawai itu pada masa dan di tempat yang sesuai sebagaimana yang dinyatakan dalam notis itu.

(5) Sesuatu perintah larangan yang dibuat di bawah subseksyen (2) yang telah berkuatkuasa boleh dibatalkan oleh Ketua Pengarah atau mana-mana pegawai yang diberi kuasa secara bertulis dengan sempurna oleh Ketua Pengarah jika dia berpuas hati bahawa kenderaan itu layak digunakan.

(6) Jika Ketua Pengarah atau seseorang pegawai menarik balik atau membatalkan sesuatu larangan dia hendaklah memberikan notis mengenai penarikan balik atau pembatalan itu kepada pemunya berdaftar kenderaan itu.

(7) Ketua Pengarah atau pegawai itu boleh melalui notis secara bertulis menghendaki pemunya berdaftar kenderaan itu mengemukakan apa-apa dokumen berhubungan dengan kenderaan itu untuk diperiksa olehnya, pada masa dan di tempat yang sesuai sebagaimana yang dinyatakan dalam notis itu.

(8) Jika mana-mana orang tidak mematuhi seksyen ini, atau menggunakan atau membenarkan digunakan sesuatu kenderaan pada bila-bila masa suatu perintah larangan di bawah subseksyen (2) sedangberkuatkuasa berhubungan dengan kenderaan itu, dia adalah melakukan suatu kesalahan dan boleh dikenakan denda tidak lebih daripada lima ribu ringgit atau penjara selama tempoh tidak lebih daripada satu tahun atau kedua-keduanya.

[Mas. Akta A636 : s.17]

## **Seksyen 48B. Bantuan.**

Ketua Pengarah atau mana-mana orang yang diberi kuasa dengan sempurna olehnya boleh menghendaki mana-mana orang memberikan bantuan seandainya terjadi pencemaran, atau ancaman

pencemaran yang mungkin berlaku pada bila-bila masa, kepada alam sekeliling.

[Mas. Akta A636 : s.17]

## **Seksyen 49. Perwakilan.**

(1) Ketua Pengarah boleh dengan perintah mewakilkan mana-mana daripada kuasa-kuasa, kewajipan-kewajipan dan tugas-tugasnya di bawah Akta ini berkenaan dengan pengeluaran lesen-lesen, penyiasatan kesalahan-kesalahan dan penguatkuasaan Akta ini kepada mana-mana pegawai awam,

mana-mana Jabatan Kerajaan, mana-mana pihak berkuasa tempatan atau mana-mana jawatankuasa yang terdiri daripada orang-orang yang dilantik olehnya.

(2) Jika Ketua Pengarah telah mewakilkan apa-apa kuasa kepada mana-mana Jabatan Kerajaan, mana-mana pihakberkuasa tempatan atau mana-mana jawatankuasa, maka mana-mana pegawai bagi Jabatan Kerajaan atau pihakberkuasa tempatan itu atau mana-mana ahli jawatankuasa itu boleh menjalankan mana-mana daripada kuasa-kuasa yang boleh dijalankan oleh Ketua Pengarah itu jika sekiranya ia telah menjalankan kuasa itu sendiri.

(3) Tiada apa-apa juga dalam seksyen ini boleh melepaskan Ketua Pengarah daripada apa-apa tanggungjawab bagi memperlindungi alam sekeliling dan daripada mentadbirkan Akta ini.

(4) Sesuatu perwakilan boleh dibatalkan atau di ubah pada bila-bila masa oleh Ketua Pengarah.

## **Seksyen 50. Perahsiaan.**

Seseorang yang menzahirkan apa-apa maklumat yang didapati olehnya berkenaan dengan pentadbiran atau pelaksanaan Akta ini atau peraturan-peraturan yang dibuat di bawahnya berhubung dengan apa-apa proses pengilangan atau rahsia tred yang digunakan pada menjalankan sesuatu tred, perindustrian atau proses tertentu, melainkan jika penzahiran itu telah dibuat bagi maksud-maksud Akta ini atau maksud-maksud sesuatu pembicaraan jenayah di bawah Akta ini atau dengan persetujuan orang yang menjalankan tred, perindustrian atau proses itu, adalah melakukan suatu kesalahan dan boleh dikenakan denda tidak lebih daripada sepuluh ribu ringgit atau penjara tidak lebih daripada lima tahun atau kedua-duanya.

## **Seksyen 51. Peraturan-peraturan.**

(1) Sebagai tambahan kepada dan bukan sebagai mengurangkan kuasa-kuasa yang terkandung dalam mana-mana peruntukan lain dalam Akta ini, Menteri boleh, selepas berunding dengan Majlis, membuat peraturan-peraturan bagi atau berkenaan dengan -

- (a) menetapkan bayaran bagi memeriksa plan-plan, penentuan-penentuan dan maklumat berhubung dengan pepasangan-pepasangan atau dengan pepasangan-pepasangan yang dicadangkan iaitu perkara bagi permohonan-permohonan untuk lesen-lesen atau untuk kelulusan

dalam apa-apa bentuk lain yang diberikan di bawah Akta ini atau mana-mana peraturan yang dibuat di bawahnya;

(b) menetapkan standad-standad atau kriteria-kriteria bagi melaksanakan apa-apa dasar atau pengklasan yang diisyiharkan mengenai alam sekeliling bagi perlindungan alam sekeliling dan bagi memperlindungi kegunaan-kegunaan berfaedah;

(c) menetapkan standad-standad atau kriteria-kriteria bagi menentukan bilakah sesuatu bahan, perbuatan atau benda itu meracun, merusakkan, mencela, memudaratkan kesihatan, atau berada dalam apa-apa perihal lain yang tersebut dalam Akta ini;

(d) melarang pelepasan, pengeluaran atau peletakan ke dalam alam sekeliling apa-apa bahan, samada cecair, pepejal atau gas dan melarang atau mengawal penggunaan sesuatu bahanapi yang tertentu;

(e) menetapkan standad-standad kualiti udara sekeliling dan standad-standad pengeluaran dan menentukan kepadatan maksima yang dibenarkan bagi apa-apa bahan yang boleh berada dalam atau dilepaskan ke dalam udara;

(ee) menetapkan standard kualiti alam sekeliling dan standard pelepasan dan menyatakan beban maksimum yang dibenarkan yang boleh dilepaskan oleh mana-mana punca ke dalam perairan daratan, dengan merujuk secara amnya atau khususnya kepada kumpulan air yang berkenaan;

(f) melarang penggunaan apa-apa kelengkapan, kemudahan, kereta, atau kapal yang boleh menyebabkan pencemaran atau mengawal pembinaan, pemasangan atau pengendaliannya untuk mencegah atau mengurangkan pencemaran hingga takat yang paling sedikit.

(g) menghendaki supaya amaran atau kewaspadaan mengenai pencemaran diberi;

(h) melarang atau mengawal pembakaran terbuka sampah-sarap atau apa-apa bahan lain yang mudah terbakar;

(i) mengawal pengadaan tempat-tempat untuk melupuskan buangan-buangan pepejal atau cecair di atas atau di dalam tanah;

- (j) mentakrifkan bunyi bising yang mencela dan menetapkan standad-standad bagi bunyibising yang boleh dibenarkan;
- (k) melarang atau mengawal mandi, berenang, bersampan atau lain-lain aktiviti dalam air di dalam atau di sekeliling mana-mana perairan, yang mudarat kepada kesihatan atau kebajikan atau bagi mencegah pencemaran.
- (l) apa-apa bahan atau benda yang diberikuasa atau dikehendaki atau dibenarkan oleh Akta ini supaya ditetapkan atau yang perlu atau mustahak ditetapkan bagi menguatkuasakan Akta ini;
- (m) *[Dipotong oleh Akta A636 : s. 18]*
- (n) *[Dipotong oleh Akta A636 : s. 18]*
- (o) *[Dipotong oleh Akta A636 : s. 18]*
- (p) menghendaki sesiapa yang mengendalikan, menyimpan atau menggunakan minyak atau campuran yang mengandungi minyak supaya melapurkan pelepasan dan pertumpahan minyak atau campuran mengandungi minyak ke dalam perairan Malaysia;
- (q) menghendaki sesiapa yang mengendalikan, menyimpan atau menggunakan minyak atau campuran yang mengandungi minyak supaya menyimpan apa-apa benda atau bahan dan kelengkapan yang perlu untuk mencegah atau menghapuskan pencemaran minyak di perairan Malaysia yang mungkin berlaku dalam masa menjalankan urusannya;
- (r) *[Dipotong oleh Akta A636 : s. 18]*
- (s) *[Dipotong oleh Akta A636 : s. 18]*
- (t) mengawal audit alam sekeliling dan pengemukaan suatu laporan audit dan perlantikan kakitangan yang berkelayakan untuk membantu Ketua Pengarah dalam menjalankan audit alam sekeliling bagi mana-mana premis itu, tanpa mengira sama ada premis itu adalah yang ditetapkan atau selainnya, dan cara pengendaliannya dan bayaran yang boleh dikenakan;

- (u) melarang atau mengawal pengilangan, penstoran, pengangkutan atau pemakaian, atau penggunaan, pengeluaran, pelepasan atau peletakan ke dalam alam sekeliling, apa-apa benda berbahaya kepada alam sekeliling;
  - (v) mengawal langkah-langkah untuk menilai, mengawal, mengurangkan atau menghapuskan risiko alam sekeliling;
  - (w) mengawal kekompetenon orang yang layak untuk menyenggara dan mengendalikan apa-apa kelengkapan atau kelengkapan kawalan.
- (2) Mana-mana peraturan itu boleh dibuat secara am atau tehad tentang kuatkuasanya mengenai masa, tempat, orang-orang, atau hal keadaan samada mana-mana masa, tempat, orang atau hal keadaan itu ditentukan atau dipastikan sebelum, pada atau selepas peraturan-peraturan itu dibuat.

[Mas. Akta A953 : s.34]

## **Kesahan [Akta A1102]**

Bagi mengelakkan keraguan, adalah dengan ini diisyiharkan bahawa semua perundungan subsidiari yang dibuat di bawah seksyen 51 Akta ibu sebelum Akta ini mula berkuat kuasa yang menentukan syarat-syarat yang boleh diterima bagi pengeluaran, pelepasan atau peletakan benda berbahaya kepada alam sekeliling, pencemar atau buangan-buangan atau pengeluaran bunyi bising ke dalam mana-mana kawasan, segmen atau unsur alam sekeliling bagi maksud seksyen 21 Akta ibu telah dibuat dengan sah bagi maksud seksyen 21 Akta ibu sebelum seksyen 21 dipinda oleh Akta ini.

## **SENARAI PINDAAN**

<i>Undang-undang yang meminda</i>	<i>Tajuk ringkas</i>	<i>Berkuat kuasa dari</i>
Akta 160	Akta Mata Wang Malaysia (Ringgit) 1975	29-08-1975
P.U. (A) 357/80	Perintah Akta Mahkamah Rendah (Perluasan) 1980	01-06-1981
<a href="#"><u>Akta A636</u></a> (Pindaan)	Akta Kualiti Alam Sekeliling 1985	10-01-1986
Akta A885	Akta Perlembagaan (Pindaan) 1994	24-06-1994
<a href="#"><u>Akta A953</u></a> (Pindaan)	Akta Kualiti Alam Sekeliling 1996	01-08-1996
<a href="#"><u>Akta A1030</u></a> (Pindaan)	Akta Kualiti Alam Sekeliling 1998	21-08-2000 [P.U. (B) 278/2000]
<a href="#"><u>Akta A1102</u></a> (Pindaan)	Akta Kualiti Alam Sekeliling 2001	28-06-2001: seksyen 2 19-07-2001: seksyen 3, 4, 5, 6

**Copyrights Reserved**

All rights reserved. No part of this publication may be reproduced, stored in retrieval system or transmitted in any form or by any means electronic, mechanical, photocopying, recording and/or otherwise without the prior permission of Law net.

PERCETAKAN NASIONAL MALAYSIA BERHAD

